

**5 Mac 2009 (Khamis)**

## **Tanah kerajaan diceroboh**

Oleh HARIS FADILAH AHMAD [utusanpahang@utusan.com.my](mailto:utusanpahang@utusan.com.my)



RAZLAN Pasadi (kiri) dan seorang penduduk menunjukkan pokok getah yang ditanam di atas tanah kerajaan yang diceroboh di Kampung Damak, Jerantut, semalam.

JERANTUT 5 Mac - Hairan dan marah - itu sahaja yang dapat diluahkan oleh penduduk Kampung Damak di sini terhadap kegiatan pencerobohan tanah milik kerajaan di kampung itu untuk menjalankan kegiatan perladangan. Mereka hairan bagaimana tanah milik kerajaan boleh diceroboh sesuka hati untuk menjalankan projek pertanian berskala besar tanpa pengawasan pihak tertentu. Penduduk terbabit juga marah kerana pencerobohan itu menyebabkan projek kemudahan awam bagi masyarakat setempat yang dirancang di tanah milik kerajaan itu tidak dapat dilaksanakan. Berikutan itu, penduduk kampung terbabit meminta Pejabat Tanah Daerah (PTD) Jerantut mengambil tindakan segera terhadap kegiatan pencerobohan tanah milik kerajaan itu untuk kegiatan perladangan.

Mereka mendakwa, tanah rizab kerajaan seluas hampir lapan hektar itu hanya dikhaskan untuk tapak bangunan kerajaan dan kemudahan awam di kampung berkenaan. Ia tidak dibenarkan sama sekali untuk projek pertanian atau komersial di kawasan terbabit. Menurut mereka, tanah terbabit diceroboh sejak setahun lalu oleh seorang pengusaha tanaman getah dan limau. Sehubungan itu, penduduk meminta penjelasan pihak berkuasa berhubung projek tanaman getah dan limau berkenaan sedangkan kawasan itu hak milik kerajaan untuk projek kemudahan awam.

Ketua Cawangan UMNO Damak, Razlan Pasadi berkata, tindakan pengusaha ladang yang berani menceroboh kawasan itu amat tidak disenangi penduduk. Kata beliau, masalah itu telah dibincangkan beberapa kali di peringkat Jawatankuasa Kemajuan Keselamatan Kampung (JKKK) Damak. "Mereka yang tidak bertanggungjawab ini bercucuk tanam tanpa memperoleh apa-apa kebenaran pihak berkuasa. "Lagipun kawasan itu merupakan tapak projek bangunan kerajaan dan kemudahan awam," katanya ketika ditemui di Kampung Damak baru-baru ini. Razlan berkata, PTD perlu bertindak segera menghalang pengusaha ladang yang tidak

bertanggungjawab itu sebagai pengajaran supaya kegiatan menceroboh tanah milik kerajaan tidak berleluasa. "Kita bimbang jika kegiatan itu dibiarkan, semakin ramai yang berani menceroboh tanah kerajaan kerana tidak ada tindakan diambil," ujarnya.

Pengerusi Gerakan Belia 4B Kampung Damak, Tengku Ahmad Shah Tengku Ismail berkata, pada awalnya penceroboh terbabit berselindung untuk mengusahakan tanaman kontan di kawasan berkenaan. Bagaimanapun, jelasnya, apabila tidak ada sebarang tindakan diambil, pengusaha terbabit memberanikan diri dengan menjalankan projek tanaman getah dan limau yang berskala besar. "Kami merasa bertanggungjawab untuk mengadu mengenai pencerobohan tanah ini kerana kegiatan berkenaan mungkin mendapat sokongan pihak tertentu untuk mendapat taraf pemilikan sementara (TOL). "Kami tidak menuduh sesiapa tetapi hairan bagaimana projek perladangan ini boleh dijalankan tanpa sebarang tindakan pihak berkuasa," katanya.

Sehubungan itu, tegas Tengku Ahmad Shah, pihaknya membantah tindakan menceroboh tanah berkenaan dan pihak berkuasa perlu menghalangnya secepat mungkin sebelum projek itu menjadi bertambah besar. Sementara itu, Ketua Pemuda UMNO Damak, Sudin Zakaria berkata, pihaknya hairan bagaimana pengusaha terbabit memperoleh tanah itu dengan begitu mudah sedangkan masih ramai penduduk kampung itu tidak mempunyai tanah sendiri. Malah, tegas beliau, penduduk terbabit sentiasa mematuhi peraturan dengan tidak menceroboh rizab kerajaan sesuka hati.

"Pemuda UMNO menggesa pihak berkuasa memantau kegiatan ini dan langkah yang paling baik ialah dengan mempercepatkan pelaksanaan projek tertentu di tapak berkenaan untuk mengelakkan daripada diceroboh pihak lain. "Penduduk telah beberapa kali mengemukakan cadangan untuk membangunkan projek kemudahan awam di tanah tersebut tetapi masih belum terlaksana. "Malangnya, tanah tersebut tidak dibangunkan dengan projek kemudahan awam sebaliknya diceroboh pihak tertentu untuk mengaut keuntungan sendiri," katanya.

Selain itu, Sudin mendakwa, kegiatan pencerobohan juga dilaporkan berlaku di beberapa kawasan lain di Kampung Batu Balai dekat sini. Sementara itu, tinjauan ke kampung itu mendapati tanah yang didakwa milik kerajaan itu diusahakan dengan tanaman getah dan limau oleh seorang pengusaha dari luar. Usaha *Utusan Malaysia* untuk mendapatkan ulasan PTD dan Ahli Dewan Undangan Negeri (ADUN) Damak, Datuk Lau Lee berhubung kegiatan pencerobohan di kampung tersebut juga gagal.

## **6 Mac 2009 (Jumaat)**

### **Kaedah tinjauan mencurigakan**

Oleh A. JAILANI ABDULLAH pengarang@utusan.com.my



T. MURUGIAH (duduk kanan), wakil-wakil agensi kerajaan yang terlibat dan wakil Carrefour mendengar taklimat daripada wakil persatuan penduduk Seksyen 11 Kota Damansara, Dali Sardar (berdiri) pada mesyuarat antara penduduk Kota Damansara dengan Biro Pengaduan Awam, Jabatan Perdana Menteri di Putrajaya, semalam. - UTUSAN/ABDUL NAZIR MOHAMED

PUTRAJAYA 5 Mac - Biro Pengaduan Awam, Jabatan Perdana Menteri curiga dengan kaedah tinjauan awam yang dijalankan oleh kerajaan negeri Selangor berhubung isu pembinaan pasar raya Carrefour di Kota Damansara. Timbalan Menteri di Jabatan Perdana Menteri, Senator T. Murugiah berkata, ini kerana tinjauan dan hasil tinjauan yang dijalankan oleh sebuah badan bebas, Merdeka Center itu kelihatan tidak mempunyai kredibiliti untuk diterima pakai. "Saya tidak berpuas hati tentang kajian yang telah dibuat oleh pihak yang dilantik oleh kerajaan negeri Selangor. "Soalan-soalannya juga mengelirukan. Di sini timbul tandatanya sama ada kajian itu telah dijalankan dengan tepat," katanya.

Beliau berkata demikian selepas mendengar hujah wakil persatuan-persatuan penduduk Seksyen 11, Kota Damansara yang membantah pembinaan pasar raya itu kerana ia terlalu hampir dengan kawasan kediaman dan sebuah sekolah. Turut hadir ialah wakil Carrefour, Majlis Bandaraya Petaling Jaya (MBPJ), Perbadanan Kemajuan Negeri Selangor (PKNS), Jabatan Keselamatan Jalan Raya (JKJR) dan Persatuan Ibu Bapa dan Guru Sekolah Rendah Kebangsaan Seksyen 11. Setakat ini, katanya, tinjauan itu didapati agak longgar kerana tidak melibatkan golongan sasaran dan tidak mempunyai bukti ia dijalankan dengan telus termasuk menyertakan butiran penting seperti nombor kad pengenalan dan lain-lain. "Tidak ada bukti kajian itu dijalankan dengan betul. Kebiasaannya, tanda tangan perlu ada dalam tinjauan awam. Ini (hasil tinjauan) sepatutnya tidak boleh diterima. "Saya pernah menjadi Ahli Majlis Bandaraya Ipoh... kajian sebegini tidak ada bukti," katanya.

Sehubungan itu, beliau akan mengarahkan pegawaiannya untuk menjalankan siasatan sendiri berhubung isu itu. "Para pegawai saya akan menyiasat dan akan memberikan saya laporan dalam masa satu minggu untuk saya rujuk kepada pihak-pihak berkaitan... jadi saya harap penduduk bersabar," jelasnya.

Ujarnya, beliau juga akan berhubung dengan Kementerian Perdagangan Dalam Negeri dan Hal Ehwal Pengguna (KPDNHEP) sama ada mereka telah diberikan penerangan yang betul sebelum meluluskan lesen perniagaan kepada Carrefour di situ. Katanya lagi, beliau juga akan merujuk kepada Kementerian Pelajaran kerana premis miliknya iaitu SRK Seksyen 11 berada sangat hampir dengan projek berkenaan.

Beliau bagaimanapun menyatakan kekesalannya kerana pihak sekolah dan PIBG tidak memberi maklum balas terhadap notis pemberitahuan yang dihantar oleh MBPJ kepada mereka sebelum

projek itu dimulakan. "Bagaimanapun, MBPJ juga seharusnya memberikan notis kepada semua penduduk sekitar dan memberi tempoh yang secukupnya untuk mereka memberi jawapan balas. "Saya juga akan menulis surat kepada MBPJ untuk mendapat jawapan mengenai hal ini," ujarnya.

Tegasnya, pihaknya tidak akan teragak-agak untuk menyokong pembatalan lesen Carrefour beroperasi di situ jika projek berkenaan didapati melanggar peraturan yang ditetapkan oleh pihak berkuasa tempatan.

## 7 Mac 2009 (Sabtu)

### Selesaikan segera isu PPSMI

Oleh WAN NAJIB WAN DAUD [najib.daud@utusan.com.my](mailto:najib.daud@utusan.com.my)

PETALING JAYA 7 Mac - Datuk Seri Abdullah Ahmad Badawi mahu isu Pengajaran dan Pembelajaran Sains dan Matematik dalam Bahasa Inggeris (PPSMI) diselesaikan segera bagi mengelakkan tercetusnya isu lebih besar pada masa depan. Perdana Menteri berkata, ini kerana terdapat desakan kuat terutama daripada orang Melayu mengenai isu tersebut dan satu keputusan segera mengenainya perlu dilakukan. "Saya mahu isu ini diselesaikan segera dan jika dilengah-lengahkan, pelbagai tekanan dan tindakan akan dilakukan oleh pertubuhan bukan kerajaan (NGO) menyebabkan ia jadi lebih besar," tegasnya.

Beliau berkata demikian kepada pemberita selepas melancarkan buku *Dragon Fire Hammer*, tulisan Adam Umemoto yang berusia 14 tahun di sini hari ini. Perdana Menteri diminta mengulas kontroversi PPSMI yang semakin memuncak apabila 5,000 orang berhimpun dan berarak membantah pelaksanaannya dari Masjid Negara ke Istana Negara, petang ini bagi menyerah memorandum kepada pihak istana. Perarakan yang tidak mendapat permit dan kebenaran itu bertukar menjadi kecoh apabila arahan polis supaya mereka bersurai tidak diendahkan ada segelintir peserta yang bertindak diluar batasan termasuk melakukan provokasi terhadap anggota pasukan keselamatan. Sehubungan itu Pasukan Simpanan Persekutuan (FRU) terpaksa menggunakan meriam air untuk menyuraikan mereka.

Perarakan tersebut menyebabkan kesesakan teruk di sepanjang Jalan Mahameru kerana laluan terpaksa ditutup dari kedua-dua arah. Dalam hubungan ini Abdullah berkata, Kementerian Pelajaran telah mengadakan beberapa perjumpaan dengan NGO terbabit bagi membincangkan perkara itu. Namun kata beliau, kementerian tersebut masih belum bersedia untuk mengumumkan bentuk keputusan yang telah diambil. Katanya, kementerian berkenaan boleh menjadikan keputusan peperiksaan lalu untuk dijadikan asas bagi menentukan pelaksanaan PPSMI itu. "Dengan cara itu saya berharap ia akan menjadi satu keputusan yang adil kepada semua kaum dan bagi mengukuhkan kepentingan pendidikan masa depan," katanya.

## **8 Mac 2009 (Ahad)**

### **Cuti bersalin 90 hari di Selangor**

SHAH ALAM 8 Mac - Selangor hari ini mengumumkan cuti bersalin 90 hari untuk semua kakitangan wanita yang bekerja dengan kerajaan negeri berkuat kuasa 1 Januari lalu. Pengumuman tambahan 30 hari daripada tempoh 60 hari yang ditetapkan sekarang dibuat sempena genap setahun pemerintahan kerajaan negeri campuran Parti Keadilan Rakyat (PKR), DAP dan Pas di negeri itu.

Menteri Besar, Tan Sri Abdul Khalid Ibrahim berkata, kakitangan terbabit bagaimanapun diberi pilihan menerima sejumlah pampasan jika mahu bekerja selepas 60 hari cuti bersalin. "Serentak dengan itu juga, suami yang menjaga isteri bersalin turut diberi tambahan cuti tujuh hari menjadikan jumlah cuti boleh diambil meningkat kepada 14 hari," katanya.

Beliau bercakap kepada pemberita selepas sesi bersama pengurus dan ahli-ahli Jawatankuasa Kemajuan dan Keselamatan Kampung (JKKK) negeri sempena sambutan satu tahun pentadbiran kerajaan baru Selangor di Dewan Raja Muda Musa di sini hari ini. Kira-kira 6,000 orang daripada lebih 400 kampung tradisi dan kampung baru di seluruh negeri menghadiri majlis tersebut.

Abdul Khalid juga memberitahu, langkah menambah cuti bersalin itu dibuat atas alasan perubatan kerana mengikut kajian Pertubuhan Bangsa-Bangsa Bersatu (PBB), bayi perlu diberi perhatian dan penjagaan rapi dalam tempoh 100 hingga 200 hari selepas dilahirkan. Beliau berharap, mereka yang layak mendapat kemudahan cuti menggunakan sebaik mungkin termasuk bagi memastikan bayi mereka mendapat suntikan imunisasi mengikut tempoh waktu ditetapkan.

Abdul Khalid turut mengumumkan balu yang baru kematian suami diberi cuti pilihan sehingga 30 hari berbanding kemudahan cuti tanpa rekod selama tiga hari yang diamalkan sekarang. Sementara itu, beliau berkata, sebanyak 40 pengurus JKKK terdiri daripada kaum India akan dilantik pada bulan depan bagi memudahkan pentadbiran di kawasan yang mereka menjadi majoriti.

Dalam pada itu, satu perbincangan akan diadakan dengan Bahagian Kewangan Negeri dan pihak terlibat berhubung cadangan menaikkan elauan pengurus JKKK daripada RM450 sebulan yang diterima sekarang. "Exco terlibat akan turut berbincang, tetapi ia hanya akan dilakukan pada bulan depan," tambahnya.

Terdahulu dalam ucapannya, Abdul Khalid mendakwa kerajaan negeri telah menuaikan janji pilihan raya antaranya memberi bekalan air percuma bagi 20 meter padu pertama kepada pengguna domestik selain memberi biasiswa dan hadiah kepada anak Selangor yang memasuki universiti.

**8 Mac 2009 (Ahad)**

## **Dana Mekah, Madinah RM100j pajak hotel di Arab Saudi**



NABIL Kadir (kanan) menunjukkan banting pelancaran Dana Mekah dan Madinah sambil disaksikan oleh Harun Din dan Ahmed Shukri Abd. Rahman (kiri sekali) di Kuala Lumpur, kelmarin.

KUALA LUMPUR 8 Mac - Koperasi Pelaburan Hartanah Bhd. (Kopraha) optimis dana Mekah dan Madinah yang baru dilancarkan semalam mampu dilanggan sepenuhnya dalam tempoh kurang daripada tiga tahun. Pengurus Eksekutif Kopraha, Datuk Nabil Abd. Kadir berkata, dana yang pertama seumpamanya diperkenalkan itu dijangka bersaiz RM100 juta dan akan digunakan untuk memajak beberapa hotel di Mekah dan Madinah bagi disewakan untuk kemudahan jemaah haji dan umrah.

Menurutnya, proses pemajakan itu akan dimulakan dalam tempoh enam bulan akan datang dan ia bakal membabitkan tiga buah hotel bertaraf empat bintang di Mekah iaitu Hotel Rehab Rauudah, Hotel Durrah dan Hotel Ufuk Al Falah. "Nilai pajakan ketiga-tiga hotel itu pada peringkat awal adalah sebanyak RM10 juta, mungkin pada masa akan datang, kami akan memajak hotel yang memiliki lebih banyak bilik, mungkin sehingga 600 bilik dan bernilai lebih daripada RM20 juta," katanya.

Beliau berkata demikian pada sidang akhbar selepas majlis pelancaran Dana Mekah dan Madinah yang telah disempurnakan oleh Penasihat Syariah Kopraha, Datuk Harun Din. Turut hadir ialah Pengarah Urusan Ash-Har Travel & Tours Sdn. Bhd. (Ash-Har), Ahmed Shukri Abd. Rahman. Nabil menjelaskan bahawa, Dana Mekah dan Madinah itu merupakan produk saham amanah kedua yang diperkenalkan oleh Kopraha bagi memberi peluang kepada lebih daripada 200 ahlinya melabur secara tidak langsung dalam industri harta tanah di Mekah dan Madinah.

Industri harta tanah di kedua-dua tempat suci bagi umat Islam itu berpotensi memandangkan ia menjadi tumpuan bukan sahaja ketika musim haji dan pada bulan Ramadan tetapi juga sepanjang tahun. Menurutnya, nilai pelaburan minimum bagi dana berkenaan adalah sebanyak RM3,000 dan menjangkakan pelaburnya bakal menikmati pulangan selepas setahun melabur dengan menikmati kadar pulangan yang kompetitif meskipun dalam keadaan iklim ekonomi yang sukar kini. "Kami menjangkakan pulangan pelaburan bagi dana ini adalah sekitar sembilan hingga 10 peratus, kami menjangkakan ia boleh mencecah sehingga kepada dua digit dalam tempoh tiga hingga lima tahun akan datang," ujar beliau.

Tambah Nabil, Kopraha dijangka menjalinkan kerjasama strategik dengan Lembaga Tabung Haji pada masa depan dalam usaha menjadikan dana berkenaan lebih berdaya saing. Buat masa sekarang rakan strategiknya adalah Ash-Har.

## **9 Mac 2009 (Isnin)**

### **Kerenah birokrasi lambatkan proses pembangunan**

JASIN 9 Mac - Semua agensi kerajaan khususnya yang terlibat dalam hal ehwal pembangunan masyarakat diminta mengurangkan kerenah birokrasi kerana ia boleh melambatkan proses membangunkan sesuatu kawasan terbabit. Ahli Dewan Undangan negeri (ADUN) Sungai Rambai, Hasan Abd. Rahman berkata, kelancaran sesuatu projek pembangunan akan terjejas jika terlalu banyak prosedur perlu dilalui sebelum agensi kerajaan berkaitan mengambil tindakan yang perlu. Misalnya, kata beliau, di Sungai Rambai sendiri, terdapat beberapa projek pembangunan seperti kawasan industri di kawasan tersebut telah tertangguh sejak lebih lima tahun lalu kerana terlalu banyak prosedur tanah yang perlu dipatuhi. "Keadaan ini menyebabkan banyak pihak terutama pemaju menjadi putus asa dan tidak berminat menjalankan projek berkenaan malah saya sebagai wakil rakyat juga kadang-kala berasa bosan dengan perkara ini," katanya.

Beliau berkata demikian selepas majlis Program 'Hampir Setahun Berlalu' dan Majlis Anugerah Kualiti Agensi Kerajaan dan Jawatankuasa Kemajuan dan Keselamatan Kampung anjuran Japerun Sungai Rambai di sini hari ini. Katanya, kerenah birokrasi dan sikap tidak komited di kalangan penjawat awam akan menyebabkan cita-cita menjadikan Sungai Rambai maju kelak tidak menjadi kenyataan. "Seluruh agensi perlu mengambil pendekatan bersepada bagi merealisasikan hasrat menjadikan DUN Sungai Rambai pesat membangun daripada sebuah pekan kecil kepada sebuah kawasan perbandaran baru yang serba moden. "Kita yakin kedudukan Sungai Rambai yang terletak di pintu masuk utama dari arah selatan amat wajar dijadikan satu landskap pertumbuhan ekonomi baru yang mencerminkan imej Melaka Maju 2010 khususnya di bahagian selatan," katanya.

Beliau berkata, banyak potensi yang boleh diterokai di DUN Sungai Rambai dan dieksplotasi menjadi produk-produk baru yang boleh menjana pertumbuhan sosio-ekonomi di 'Gerbang Selatan' Melaka. Menurut Hasan, Program 'Hampir Setahun Berlalu' adalah manifestasi kepada usaha berterusan seluruh peringkat kepimpinan dan rakyat setempat di DUN Sungai Rambai bagi memastikan segala projek pembangunan yang sudah dirancang sejak hampir setahun lalu dilaksanakan. "Setakat ini, saya agak berpuas hati dengan tahap pencapaian Sungai Rambai namun saya merasakan proses pembangunan ini boleh dilakukan dengan lebih cepat jika pihak-pihak tertentu lebih komited dalam soal ini. "Saya harap sesetengah agensi terbabit dapat menyeferakan sesuatu keputusan dan kelulusan bagi memastikan semua yang dirancang dapat dilaksanakan mengikut jadual yang ditetapkan," katanya.

Kata beliau, masalah paling ketara penduduk di kawasan tersebut ialah ketiadaan dewan sekolah yang sempurna untuk kegunaan pelajar selain kemudahan beberapa sekolah rendah yang kini tidak mampu menampung pertambahan murid.

## **9 Mac 2009 (Isnin)**

### **LTN rugi RM23 juta akibat banjir kilat**

BACHOK 9 Mac — Kira-kira RM23 juta kerugian dilaporkan akibat banjir kilat selama tiga hari yang membabitkan kawasan seluas 1,500 hektar kawasan tanaman tembakau di jajahan ini minggu lalu. Penolong Pengarah Lembaga Tembakau Negara (LTN) Negeri Razali Harun berkata kerugian itu tidak termasuk keseluruhan kawasan tanaman yang terlibat dengan bencana alam itu di seluruh negeri termasuk di jajahan Pasir Puteh. Angka itu diperoleh hasil kajian yang dibuat oleh Jawatankuasa Pemantauan Tanaman dan Pengeluaran (JKPTP) LTN yang bermesyuarat semalam. Angka kerugian itu membabitkan kos nilai hasil yang akan dipungut oleh petani, kos tenaga buruh dan bahan input, katanya kepada Bernama di sini, hari ini.

Beliau berkata kawasan tanaman tembakau yang rosak itu membabitkan 1,968 petani yang mengusahakan tanaman tembakau menerusi Program Penanam Pengawit Individu (PPI) di mana petani yang mengusahakannya mempunyai rumah asap (awet) sendiri manakala selebihnya petani yang menjual hasil tanaman mereka kepada syarikat pengawet swasta. Mesyuarat JKPTP semalam juga turut membuat kajian terperinci mengenai petani yang terlibat dengan bencana alam itu mengikut keluasan kawasan masing-masing untuk dikemukakan ke kementerian sebelum tindakan selanjutnya diambil, termasuk memberi bantuan yang diperlukan petani, katanya.

Beliau berkata, mengikut kajian itu juga, jangkaan prospek kerugian hasil yang dialami LTN pada kejadian banjir kilat baru-baru ini ialah RM5,800 bagi setiap satu hektar dan jumlah kerugian keseluruhannya ialah RM8.7 juta. Sebelum ini dalam kajian awal yang dibuat LTN menganggarkan petani di negeri ini mengalami kerugian sebanyak RM4 juta akibat banjir kilat yang melanda kawasan tanaman itu di seluruh negeri ini. — Bernama

## **9 Mac 2009 (Isnin)**

### **Guna pendekatan berhemah selesai isu PPSMI**

RAMAI yang kesal dengan insiden perarakan ke Istana Negara kelmarin. Perarakan membantah pelaksanaan dasar Pengajaran dan Pembelajaran Sains dan Matematik dalam Bahasa Inggeris (PPSMI) itu ternyata telah dipolitikkan. Isu yang sepatutnya diselesaikan secara dialog, telah diheret ke jalanan. Tidak dapat dipastikan adakah kesemua yang terlibat dalam perarakan itu benar-benar faham apa yang 'diperjuangkan' atau sekadar ikut-ikutan. Perarakan yang bertukar

menjadi tidak terkawal itu sekali lagi memberi imej hitam pada negara. Ia mencetuskan reaksi segera banyak pihak. Ramai yang mendakwa isu itu telah dipergunakan oleh pihak berkepentingan. Dan, ada agenda lain yang tersembunyi di sebaliknya. Pengerusi Gerakan Memansuhkan PPSMI (GMP), Datuk Dr. Hassan Ahmad mengambil sikap mudah. Beliau menuding jari pada pihak lain. Kekecohan mungkin didalangi pihak ketiga, katanya. Beliau berhujah bahawa pihaknya tidak merancang perarakan ke Istana Negara itu.

Persoalannya, kenapakah perkara itu tetap berlaku? Bolehkah GMP lepas tangan begitu sahaja? Adakah perjuangan GMP itu kini turut dirasuki sentimen perarakan jalanan seperti yang dipelopori oleh pembangkang? Gambar-gambar yang dirakamkan mungkin boleh mengiyakan persoalan ini. Jelas terpampang pemimpin Pas seperti Datuk Seri Abdul Hadi Awang dan Nasharuddin Mat Isa turut bersekongkol. Perarakan itu bukan sekadar mendapat restu mereka malah mereka sendiri turut 'turun padang'. Adakah sokongan pembangkang kepada gerakan itu tidak disedari oleh GMP? Atau Pas cuba merebut peluang pada setiap kesempatan yang ada. Sekurang-kurangnya boleh menarik simpati lebih ramai orang Melayu. Mungkin itu percaturan mereka. Perarakan seperti itu tidak seharusnya mengambil tempat. Kita percaya walaupun tanpa perarakan, GMP pasti berjaya menyerahkan memorandum bantahan PPSMI kepada pihak Istana Negara. Ia boleh dilakukan tanpa sebarang provokasi. Hanya melalui pendekatan mudah secara berhemah.

Banyak lagi ruang yang boleh dimanfaatkan untuk menyelesaikan kemelut itu. Dialog adalah jalan terbaik. Kerajaan sendiri telah pun menyediakan pelbagai mekanisme untuk itu. Malah, Kementerian Pelajaran sedang berusaha mengumpulkan semua data dan fakta berhubung PPSMI untuk dibentangkan ke mesyuarat Kabinet tidak lama lagi. Keputusan akhir akan diputuskan di peringkat Kabinet.

Yang pasti, tindakan tergopoh-gapah tidak akan menyelesaikan masalah. Tindakan secara berhemah lebih tepat untuk itu. PPSMI dilaksanakan pada 2003. Masih terlalu awal untuk diukur sama ada ia berkesan ataupun tidak. Perkara baru pasti tidak akan sempurna. Akan wujud kekurangan. Tetapi ia pasti boleh diatasi. Jika pelajar luar bandar dibimbangi gagal menguasai kedua-dua mata pelajaran itu, masih ada jalan penyelesaiannya. Hantar sahaja guru-guru berkemahiran ke sana. Didik mereka dengan sebaik mungkin.

Pelaksanaan PPSMI perlu dilihat daripada sudut positif. Berasaskah kekhuitiran bahawa bahasa Melayu akan pupus dengan pelaksanaan PPSMI? Adakah PPSMI merupakan satu-satunya punca? Dan sekiranya PPSMI dihapuskan, adakah bahasa Melayu akan disemarakkan penggunaannya? Paling penting demonstrasi jalanan bukan jawapannya. Jangan politikkan isu ini. Jangan ada pihak cuba menangguk di air keruh. Jangan tiba-tiba ada pihak muncul menjadi 'pejuang'. Di mana 'pejuang' ini ketika Ahli Parlimen DAP Bukit Mertajam, Chong Eng menggesa kerajaan membenarkan penggunaan pelbagai bahasa termasuk Mandarin dalam urusan pentadbiran agensi kerajaan, minggu lalu. Ketika itu, tiada seorangpun Ahli Parlimen pembangkang termasuk Pas sendiri yang menyuarakan bantahan. Mungkin bagi mereka, bahasa Melayu tidak akan lupus walaupun terpaksa bersaing dengan bahasa-bahasa lain jika diguna pakai dalam urusan kerajaan. Kita tidak mahu sikap *double standard* dalam soal ini.

## **10 Mac 2009 (Selasa)**

### **PPSMI tidak perjudi bahasa kebangsaan**

PUTRAJAYA 10 Mac - Kementerian Pelajaran tidak akan memperjudikan nasib dan masa depan pelajar sekolah di negara ini dalam agenda memartabatkan bahasa kebangsaan. Menterinya, Datuk Seri Hishammuddin Tun Hussein menegaskan, pihaknya ikhlas ingin melihat keputusan yang dibuat mengenai isu Pengajaran dan Pembelajaran Sains dan Matematik dalam Bahasa Inggeris (PPSMI) memberi kebaikan kepada semua pihak. "Agenda ini kita akan terus perjuangkan dengan kerjasama para pejuang bahasa termasuk Datuk Dr. Hassan Ahmad dan Datuk A. Samad Said. "Saya berharap isu ini semakin difahami oleh segenap lapisan rakyat. Ia merupakan usaha untuk meningkatkan penguasaan Sains dan Matematik yang tidak akan sekali-kali meminggirkan Bahasa Melayu," katanya dalam satu kenyataan di sini hari ini.'

Semalam, Hassan yang juga Pengerusi Gerakan Memansuhkan PPSMI menafikan bahawa perjuangan menghapuskan dasar itu didalangi pihak tertentu. Sebaliknya, jelas beliau, ia terbit dari kesedaran para pejuang bahasa untuk memartabatkan bahasa Melayu dan bahasa ibunda di negara ini. Mengulas lanjut, Hishammuddin berkata, apa yang disebutkan oleh Hassan yang juga bekas Ketua Pengarah Dewan Bahasa dan Pustaka itu amat tulus dan beliau tidak pernah meragui keikhlasannya bersama A. Samad serta para pejuang bahasa yang lain.

"Namun saya percaya pihak parti pembangkang selama ini mengambil kesempatan untuk 'menangguk di air keruh' dengan menjadikan isu ini sebagai platform bagi mengelirukan rakyat sekali gus menimbulkan kemarahan rakyat terhadap kerajaan. "Saya sedar mereka ini mengambil kesempatan terhadap niat ikhlas kumpulan pejuang bahasa ini dan menggunakan peluang yang ada dengan apa cara sekalipun bagi meraih sokongan politik tanpa mempedulikan kesan dan natijahnya kepada keharmonian dan kesejahteraan negara," katanya. Cuma, Hishammuddin mengharapkan dalam hal pendidikan ialah jangan ia terus dipolitikkan memandangkan perkara itu menyentuh soal kepentingan dan masa depan anak-anak.

## **10 Mac 2009 (Selasa)**

### **Ekonomi - Satu kejutan**

KUALA LUMPUR 10 Mac - Sememangnya mengejutkan. Namun ramai berpuas hati dengan jumlah peruntukan yang diumumkan. Peruntukan RM60 bilion mengatasi angka unjuran kebanyakan pakar ekonomi menunjukkan keazaman kerajaan untuk benar-benar berusaha mengelakkan negara daripada terjerumus ke dalam jurang kemelesetan. Pengumuman pakej rangsangan kedua dalam mini bajet juga disifatkan sangat komprehensif. Namun begitu, apa yang perlu dilakukan kerajaan adalah memastikan pengurusan pelaksanaan program yang dirangka itu dibuat dengan teliti untuk memastikan ia berjaya dalam jangka panjang.

Menurut Ketua Pengarah Institut Kajian Strategik dan Antarabangsa (ISIS), Profesor Dr. Mahani Zainal Abidin, bajet mini itu begitu lengkap dan menyeluruh bagi membolehkan Malaysia terus bertahan dalam ketidaktentuan ekonomi global. Beliau juga menyifatkan bajet mini itu sebagai kreatif kerana meskipun jumlahnya besar tetapi ia hanya melibatkan tanggungan terus kerajaan sebanyak RM18 bilion manakala bakinya dijalankan bersama dengan seluruh sektor ekonomi. "Saya lihat perancangan bajet mini ini dibuat dengan cukup baik kerana memberi situasi menang-menang kepada semua pihak. "Paling penting walaupun peruntukan yang diberikan besar tetapi kerajaan hanya menanggung beban defisit fiskal 7.6 peratus pada tahun ini," katanya kepada *Utusan Malaysia* di sini hari ini.

Pakar ekonomi, Tan Sri Ramon Navaratnam yang dilihat sebagai lantang dalam memperkatakan tentang perkembangan ekonomi negara, berpuas hati dengan program yang disusun dalam bajet mini kerana ia mengurangkan bebanan yang dihadapi oleh rakyat dan sektor perniagaan. Menurutnya, bajet mini yang dibentang itu menunjukkan bahawa kerajaan begitu yakin untuk menangani kemelesetan ekonomi. "Ini kerana program yang dirancang akan dilaksanakan dengan kerjasama rakyat dan swasta. "Paling menarik, dalam situasi ketidaktentuan ini, Jawatankuasa Pelaburan Asing (FIC) akan mengguna pakai pendekatan lebih liberal untuk menarik lebih banyak pelabur asing, bagi saya ia adalah luar biasa dan unik dalam situasi semasa," ujar beliau.

Seorang lagi pakar, Dr. Hamzaid Yahya pula berpendapat bajet mini yang dibentang cukup inovatif kerana ia tidak menyalurkan wang terus sebaliknya melalui aktiviti makro yang dilaksanakan oleh kerajaan, pengguna dan pihak swasta. Beliau berkata, jaminan modal yang disediakan kepada industri yang terjejas berikutan keengganan pihak bank memberikan pinjaman akan memberi keleaan golongan perniaga khususnya industri kecil dan sederhana.

Dr. Hamzaid percaya Malaysia mampu terus bertahan dalam tempoh kritikal iaitu sepanjang tahun ini dan tahun depan sekiranya kerajaan mampu melaksanakan pakej ini dengan baik. Jelasnya, rakyat tidak perlu bimbang akan keupayaan kapasiti kerajaan untuk melaksanakan program bajet mini kerana Malaysia mempunyai pasaran domestik yang mampu menyediakan pembiayaan. "Rakyat tidak perlu mempertikaikan isu kapasiti kerana kita memiliki cukup sumber," tambahnya.

Ketua Pegawai Pelaburan ASM Services Sdn. Bhd., Rusli Abu Yamin pula meramalkan pemberian diskau RM5,000 untuk membeli kereta baru Proton dan Perodua dan rebat 50 peratus kepada caj pendaratan kapal terbang akan memberi kesan segera kepada ekonomi negara. "Bagi pembinaan dan lain-lain mungkin mengambil sedikit masa untuk dirasai kesannya," katanya.

## **10 Mac 2009 (Selasa)**

### **Kos LCCT baru dijangka RM2 bilion - Najib**

KUALA LUMPUR 10 Mac - Pembinaan Terminal Penerbangan Tambang Murah (LCCT) yang baru di Sepang dijangka menelan belanja sebanyak RM2 bilion. Menteri Kewangan, Datuk Seri Najib Tun Razak berkata, projek itu merupakan sebahagian daripada projek yang telah dikenal pasti oleh kerajaan untuk dilaksanakan di luar peruntukan bajet (off-budget) bernilai RM5 bilion. Beliau yang juga Timbalan Perdana Menteri berkata, selain pembinaan LCCT itu, kerajaan akan melakukan pembesaran lapangan terbang Pulau Pinang bernilai RM250 juta.

Najib berkata demikian ketika membentangkan pakej rangsangan kedua dalam bajet mini di sini hari ini. Selain itu, tambah beliau, pelaburan berjumlah RM2.4 bilion oleh Suruhanjaya Komunikasi dan Multimedia Malaysia akan membabitkan pelaksanaan projek peningkatan infrastruktur telekomunikasi, termasuk perpustakaan jalur lebar, Pusat Jalur Lebar Komuniti serta penyediaan telefoni asas di 89 buah daerah di kawasan luar bandar. "Ia juga melibatkan pembinaan jejantas dan laluan berbumbung antara bangunan terutamanya di kawasan Segi Tiga Emas, di sini dengan kos sebanyak RM100 juta," katanya.

## **10 Mac 2009 (Selasa)**

### **Khazanah dapat RM10 bilion**

KUALA LUMPUR 10 Mac - Khazanah Nasional Bhd. (Khazanah) berkata peruntukan yang diberikan kepada sayap pelaburan kerajaan itu akan mengiat dan meningkatkan pelaksanaan pelaburan dalam sektor-sektor yang memberi kesan berganda kepadanya. Sektor-sektor itu ialah telekomunikasi, riadah dan pelancongan, teknologi (termasuk teknologi maklumat dan telekomunikasi, industri kreatif dan pembangunan lestari atau teknologi hijau, sains hayat, kesihatan dan pertanian).

Pengarah Urusannya, Tan Sri Azman Mokhtar berkata, pelaburan dalam sektor-sektor ini oleh Khazanah dan syarikat-syarikat berkaitan kerajaan di bawahnya akan berjumlah lebih daripada RM10 bilion, dengan potensi untuk mewujudkan kira-kira 70,000 peluang pekerjaan menjelang 2011. "Jumlah pakej rangsangan sebanyak RM60 billion dalam bajet mini secara keseluruhannya adalah cukup besar untuk memberikan kesan segera dan ketara. "Pecahan sebanyak 80:20 (RM48 bilion:RM12 bilion) antara inisiatif sektor swasta membina keupayaan dan langkah-langkah jaringan keselamatan sosial adalah amat seimbang dan direka dengan baik," katanya dalam kenyataan di sini hari ini.

Menurut beliau, sektor-sektor tersebut dengan tumpuan yang lebih tinggi kepada pengisian hak milik intelek dan perkhidmatan, merupakan penjana pertumbuhan baru bagi negara dan akan menyokong peningkatan struktur ekonomi yang berterusan. Pelaburan yang dibuat secara

khusus dan mengikut sektor itu secara amnya adalah dalam bidang-bidang baru dan secara semula jadi memiliki faktor pemangkin tinggi, seterusnya membantu mencetuskan lebih banyak penglibatan sektor swasta pada masa depan. '

'Semua program pelaburan ini melibatkan projek-projek yang sedia untuk dilancarkan. "Memandangkan semuanya merupakan hasil daripada pelbagai kajian sektor secara terperinci yang telah pun dijalankan oleh Khazanah, termasuk projek-projek berkaitan zon-zon pelaburan khusus seperti Iskandar Malaysia," ujarnya

Terdahulu, Timbalan Perdana Menteri ketika membentangkan pakej rangsangan kedua dalam bajet mini berkata, dana itu akan diberi keutamaan kepada aktiviti pelaburan domestik yang mempunyai kesan pengganda tinggi bagi mewujudkan lebih banyak peluang pekerjaan. Beliau berkata, sektor strategik yang diberi keutamaan termasuk telekomunikasi, teknologi, pelancongan, pertanian, sains hayat dan projek berkaitan Iskandar Malaysia.

Najib berkata, pada tahun ini, Khazanah akan melabur sebanyak RM3 bilion dalam sektor telekomunikasi bertujuan membolehkan anak sya rikatnya menambah baik dalam infrastruktur jalur lebar negara. "Khazanah juga akan mempergiatkan pembangunan Iskandar Malaysia melalui suntikan pelaburan sebanyak RM1.7 bilion pada tahun ini bagi pembinaan infrastruktur, hotel, taman tema dan universiti," katanya.

## **10 Mac 2009 (Selasa)**

### **Pakej RM60 bilion**

Oleh MARHAINI KAMARUDDIN pengarang@utusan.com



Perdana Menteri, Datuk Seri Abdullah Ahmad Badawi bersalaman dengan Datuk Seri Najib Tun Razak selepas timbalannya itu membentangkan pakej rangsangan ekonomi kedua bernilai RM60 bilion di Parlimen, semalam.

– UTUSAN/MOHD. NAIM AZIZ

KUALA LUMPUR 10 Mac – Melebihi jangkaan! Kerajaan hari ini mengumumkan pakej rangsangan tambahan berjumlah RM60 bilion – suntikan yang dijangka mampu memulihkan ekonomi negara yang lembap kesan kemelesetan global dan pada masa sama, memastikan kesejahteraan rakyat. Pakej yang diumumkan oleh Timbalan Perdana Menteri, Datuk Seri Najib Tun Razak itu lebih sekali ganda daripada sekurang-kurangnya RM30 bilion atau 30 peratus daripada Bajet 2009 yang diharap-harapkan oleh pelbagai pihak termasuk penganalisis

ekonomi. Bajet Mini yang dibahagikan kepada empat teras itu akan dilaksanakan dalam tempoh dua tahun iaitu 2009 dan 2010.

- Teras pertama sebanyak RM2 bilion akan memberi tumpuan mengurangkan pengangguran dan menambah peluang pekerjaan;
- Teras kedua, RM10 bilion untuk meringankan beban rakyat terutamanya golongan mudah terjejas;
- Teras ketiga, RM29 bilion untuk membantu sektor swasta menghadapi krisis dan
- Teras keempat, RM19 bilion untuk membina keupayaan masa depan.

Mungkin tidak menyangka saiz ‘Bajet Mini’ yang cukup besar akan diumumkan, Najib yang juga Menteri Kewangan langsung tidak diganggu oleh Ahli Parlimen termasuk pembangkang sepanjang pembentangan sejam 17 minit – berbeza ketika beliau membentangkan pakej rangsangan pertama RM7 bilion November tahun lalu. “Jumlah RM60 bilion ini merupakan hampir sembilan peratus daripada KDNK (Keluaran Dalam Negara Kasar). Pelaksanaan Pakej Rangsangan yang bersaiz besar seperti ini adalah kali pertama dilakukan dalam sejarah ekonomi negara,” katanya ketika membentangkan Rang Undang- undang Perbekalan Tambahan 2009 atau Bajet Mini itu bagi bacaan kali kedua di Dewan Rakyat hari ini.

Menurut Najib, daripada jumlah pakej rangsangan kedua itu, sebanyak RM15 bilion merupakan suntikan fiskal, RM25 bilion Dana Jaminan, RM10 bilion pelaburan ekuiti, RM7 bilion daripada inisiatif pembiayaan swasta (PFI) dan off-budget serta RM3 bilion insentif cukai. Beliau yakin peruntukan RM206 bilion dalam Bajet 2009, ditambah RM7 bilion Pakej Rangsangan Pertama dan kini RM60 bilion dalam Bajet Mini mampu mengurangkan kesan penguncutan ekonomi global ke atas ekonomi negara.

Memandangkan senario ekonomi global yang meruncing, Najib berkata, Pakej Rangsangan Kedua ini perlu bersifat lebih komprehensif dan bersaiz besar yang menjangkau lebih banyak sektor ekonomi dan kumpulan sasaran. Ini termasuk pekerja, pengguna, pelabur, peniaga kecil dan sederhana, pengeksport dan graduan menganggur.

Di samping itu, langkah-langkah yang dirangka bukan sahaja memberi tumpuan kepada usaha merangsang ekonomi dalam tempoh terdekat tetapi merangkumi inisiatif membina kapasiti ekonomi jangka panjang. Ini menurutnya, akan menjamin Malaysia lebih bersiap sedia untuk meraih segera peluang tatkala ekonomi global kembali pulih kelak.

“Kerajaan beriltizam untuk terus melakukan segala yang termampu untuk mengukuhkan keyakinan rakyat dan meringankan keperitan yang dirasai terutamanya kepada mereka yang mudah terjejas. “Kerajaan akan memastikan kesejahteraan semua rakyat akan terus dibela dan tiada yang terpinggir daripada mendapat manfaat langkah- langkah yang dilaksanakan,” katanya.

Sebagai bukti keprihatinan kerajaan terhadap kerumitan rakyat, teras pertama dan kedua dalam Bajet Mini memberi tumpuan menyeluruh daripada soal memberi latihan, menjaga kebijakan dan mewujudkan peluang pekerjaan kepada pekerja yang diberhentikan serta siswazah menganggur sehingga kepada subsidi tol, gula, roti dan tepung gandum.

Menurutnya, sebanyak RM674 juta diperuntukkan sebagai subsidi tambahan untuk mengelakkan kenaikan harga bahan makanan harian. "Tanpa subsidi ini, harga gula akan meningkat 47 sen sekilo, tepung gandum naik 60 sen sekilo dan roti 400 gram meningkat 26 sen," katanya sambil menambah sebanyak RM480 juta lagi disediakan supaya kadar tol tidak dinaikkan.

Untuk mengurangkan pengangguran dan menambah peluang pekerjaan, Najib berkata, kerajaan akan mewujudkan 163,000 peluang latihan dan penempatan pekerjaan di sektor awam dan swasta. Ini meliputi 63,000 kakitangan untuk mengisi kekosongan jawatan di pelbagai agensi kerajaan termasuk 13,000 jawatan pegawai kontrak.

## 10 Mac 2009 (Selasa)

### Projek dijamin tidak jejas alam sekitar



ILIAS Ibrahim (kiri) melihat replika Kota Kinabalu City Waterfront yang bakal menjadi mercu tanda baru di Kota Kinabalu, Sabah.

KOTA KINABALU 10 Mac - Dewan Bandaraya Kota Kinabalu (DBKK) memberi jaminan pembinaan projek Kota Kinabalu City Waterfront (KKCW) di bandar raya ini tidak akan menjejaskan alam sekitar di kawasan sekitarnya. Datuk Bandar Kota Kinabalu, Datuk Iliyas Ibrahim berkata, pihaknya akan memastikan persekitaran semula jadi di sepanjang tapak projek tersebut tidak diubah daripada bentuk asalnya.

Sehubungan itu, katanya, DBKK tidak akan membenarkan sebarang kerja menambak pantai dilakukan bagi menjayakan projek tersebut. "Dalam usaha kita membangunkan bandar raya ini, sudah menjadi polisi DBKK untuk tidak merosakkan alam sekitar. "Oleh itu, setiap projek pembangunan yang akan dilakukan perlu melalui proses kajian mendalam termasuk kesan kepada alam sekitar serta maklum balas daripada agensi berkaitan sebelum diluluskan," katanya.

Iliyas berkata, DBKK tidak akan bertolak ansur atau meluluskan sebarang projek pembangunan yang boleh memusnahkan alam semula jadi. "Kita berharap orang ramai akan memberi sokongan dan kerjasama, projek KKCW akan memberi manfaat yang besar terhadap ekonomi dan juga membuka lebih banyak peluang perniagaan," ujarnya.

Sementara itu, seorang warga kota, **James Bubudan**, 30, berharap, DBKK akan mengkotakan janjiannya untuk tidak mencemar alam sekitar kerana ia merupakan aset utama di bandar raya ini. Katanya, alam sekitar di sini menjadi daya penarik bukan sahaja kepada pelancong tempatan tetapi juga pelancong luar negara.

Seorang lagi warga kota, **Jikuat Engson**, 42, pula mengalu-alukan projek tersebut kerana yakin KKCW akan menjadi daya tarikan baru negeri ini. "Sebabnya di negeri lain, masih belum ada destinasi pelancongan yang berkonsepkan seperti KKCW. Saya percaya KKCW akan menjadi satu lagi keistimewaan di Bandaraya Kota Kinabalu," katanya.

## 11 Mac 2009 (Rabu)

### **Penstrukturran bekalan air selesaikan masalah pinjaman negeri**

KUALA LUMPUR 11 Mac - Penstrukturran semula industri perkhidmatan bekalan air negara akan menyelesaikan masalah pinjaman kepada Kerajaan Persekutuan berjumlah RM10.5 bilion yang gagal dibayar oleh kerajaan-kerajaan negeri sejak 2007. Timbalan Perdana Menteri, Datuk Seri Najib Tun Razak berkata, penstrukturran semula itu dibolehkan berikutan pindaan Perlembagaan Persekutuan pada 2005 yang memindahkan perkara bekalan dan perkhidmatan air dari Senarai Negeri ke Senarai Bersama.

Beliau berkata, ia bermakna Kerajaan Persekutuan akan bersama-sama dengan kerajaan negeri bertanggungjawab menyediakan perkhidmatan bekalan air dengan cekap, bermutu dan pada harga berpatutan kepada rakyat. "Walaupun negeri-negeri yang telah menswastakan perkhidmatan airnya telah menunjukkan pengurangan peratusan kadar air tidak berhasil (NRW), mereka tetap menghadapikekangan membayar balik pinjaman. "Ia adalah kerana tarif tidak dapat dinaikkan seperti yang dipersetujui dalam perjanjian konsesi," katanya.

Beliau berkata demikian ketika menghadiri majlis menandatangani penstrukturran semula perkhidmatan bekalan air Negeri Johor antara SAJ Holdings dan Pengurusan Aset Air Berhad (PAAB) di Hotel Mandarin Oriental di sini hari ini. Turut hadir, Menter Besar Johor, Datuk Abdul Ghani Othman dan Menteri Tenaga, Air dan Komunikasi, Datuk Shaziman Abu Mansor, Ketua Setiausaha Perbendaharaan, Kementerian Kewangan, Tan Sri Dr Wan Abd.Aziz Wan Abdullah dan Setiausaha Kerajaan Negeri Johor, Datuk Abdul Latiff Yusof. Katanya lagi, ia merupakan masalah yang telah sekian lama dihadapi tanpa jalan penyelesaian yang memerlukan perhatian serius oleh semua pihak. Beliau berkata, Kerajaan Persekutuan yang sentiasa prihatin dengan masalah kerajaan negeri dan syarikat konsesi telah segera bertindak dan bertanggungjawab menyelesaikan isu ini," kata beliau yang juga Menteri Kewangan.

**11 Mac 2009 (Rabu)**

## **UTM Skudai bakal miliki kompleks sukan RM53 juta**



Prof. Mohd. Tajudin Ninggal (tiga dari kiri) memberi penerangan mengenai kompleks sukan UTM kepada pegawaiannya di UTM, Skudai, Johor Bahru, semalam.

JOHOR BAHRU 11 Mac - Universiti Teknologi Malaysia (UTM) bakal memiliki kompleks sukan bertaraf antarabangsa bernilai kira-kira RM53 juta di kampus Skudai pada penghujung tahun ini. Timbalan Naib Canselor (Hal Ehwal Pelajar dan Alumni) UTM, Prof. Mohd. Tajudin Ninggal berkata, pembinaannya selari dengan hasrat kerajaan untuk melahirkan atlet kelas dunia dengan memanfaatkan sepenuhnya bidang sains sukan.

Menurutnya, pembinaan kompleks itu berkemungkinan mendorong UTM mewujudkan Fakulti Sains Sukan yang kini hanya bertaraf Jabatan Sains Sukan. "Kerja-kerja pembinaan telah dimulakan Oktober tahun lalu dan antara kemudahan yang bakal ditawarkan adalah stadium bola sepak yang dilengkapi trek, kolam renang bertaraf Olimpik, gelanggang badminton dan gimnasium," katanya.

Beliau berkata demikian pada sidang akhbar selepas merasmikan Karnival Kerjaya '09 UTM ke-16 di Skudai, di sini hari ini. Mohd. Tajudin berkata, dengan adanya kompleks itu, Jabatan Sains Sukan mempunyai alasan kukuh untuk mengemukakan cadangan bagi mengembangkan lagi jabatan itu hingga menjadi Fakulti Sains Sukan.

Beliau berkata, pada masa ini, Jabatan Sains Sukan UTM mengambil antara 50 hingga 60 penuntut pada setiap tahun dan pengambilan akan ditingkatkan seiring kewujudan kompleks sukan berkenaan. Menurutnya, kompleks itu terletak berhampiran Jalan Skudai menghala ke Kulaijaya dan perancangan telah dibuat untuk membina laluan masuk ke kompleks itu dari jalan tersebut. Dalam pada itu, katanya, 80.3 peratus daripada siswazah UTM yang menamatkan pengajian pada tahun lalu, berjaya mendapatkan pekerjaan. "Jumlah ini meningkat berbanding kira-kira 78 peratus siswazah UTM pada 2007 didapati berjaya mendapat pekerjaan. "Malah 50 peratus daripada lulusan pada tahun lalu bekerja di syarikat multinasional sekali gus membuktikan graduan UTM mendapat permintaan tinggi," katanya.

Sementara itu, Karnival Kerjaya '09 UTM yang diadakan selama empat hari bermula semalam dan disertai kira-kira 40 agensi swasta dan kerajaan menawarkan lebih daripada 1,000 peluang pekerjaan kepada graduan.

**11 Mac 2009 (Rabu)**

### **Kawal tanah rizab KTMB - MB**

SEREMBAN 11 Mac - Jabatan dan agensi di bawah Kerajaan Pusat termasuk Keretapi Tanah Melayu Berhad (KTMB) digesa mengawal dan menghalang tanah rizab milik mereka daripada dijadikan penempatan haram sehingga menggagalkan matlamat kerajaan ke arah setinggan sifar pada 2010. Gesaan itu dibuat Kerajaan Negeri Sembilan yang berdepan kesukaran membanteras setinggan di negeri ini disebabkan tindakan agensi-agensi Kerajaan Pusat membiarkan tanah rizab mereka dicerobohi dan dijadikan penempatan setinggan.

Menteri Besar, Datuk Seri Mohamad Hasan berkata, pada masa ini semakin banyak rumah setinggan dibina dan terus dihuni di kawasan tanah rizab agensi berkaitan termasuk milik KTMB. Menurutnya, amat malang bagi kerajaan negeri yang mempunyai dasar menghapuskan setinggan tetapi sukar dicapai kerana tidak dapat berbuat apa-apa terhadap setinggan di tanah rizab bukan miliknya.

"Saya minta agensi-agensi pusat supaya jangan biarkan tanah rizab mereka jadi penempatan setinggan, jika tidak matlamat kerajaan ke arah setinggan sifar tidak akan tercapai. "Penempatan di kawasan terbabit bukan saja membahayakan penduduk malah membantutkan usaha kerajaan membela nasib mereka termasuk menyediakan penempatan baru seperti kawasan setinggan lain," katanya.

Beliau berkata demikian selepas mempengerusikan mesyuarat Exco di Wisma Negeri di sini hari ini. Mohamad menambah, di bawah Dasar Jaringan Keselamatan Sosial, kerajaan berusaha mencapai matlamat untuk menghapuskan miskin tegar terutama di kalangan setinggan menjelang 2010. "Salah satu yang harus dilaksanakan ialah memastikan menjelang 2010 tiada lagi setinggan di tanah kerajaan di negeri ini. Sekarang kita berusaha pindahkan penduduk setinggan di beberapa tanah kerajaan negeri ke penempatan baru dan ia berjalan lancar. "Apa yang menjadi masalah ialah setinggan di tanah milik agensi Kerajaan Pusat. Ia di luar bidang kuasa kerajaan negeri untuk bertindak," kata beliau.

Menurut beliau, tanah rizab agensi Kerajaan Pusat jika tidak dijaga akan terus menjadi penempatan setinggan dan usaha membantu dan membela nasib penduduk terlibat sukar dilakukan. "Keprihatinan agensi terlibat menjaga dan menguruskan tanah rizab mereka akan melancarkan usaha kerajaan ke arah sifar miskin tegar menjelang 2010," tambahnya.

Tambah Mohamad, Dasar Keselamatan Sosial berjaya dilaksanakan oleh kerajaan negeri termasuk mengurangkan golongan miskin melalui pelbagai bantuan yang disalurkan. "Kerajaan negeri akan terus memantau dan memberi bantuan yang sepatutnya kepada mereka yang memerlukan dan dikategorikan miskin tegar. "Tahun lalu saja 32,601 penduduk miskin di seluruh negeri menerima bantuan di bawah dasar tersebut," katanya.

**12 Mac 2009 (Khamis)**

### **Kajian PPSMI ke Kabinet sebulan lagi**

KUANTAN 12 Mac - Hasil kajian mengenai dasar Pengajaran dan Pembelajaran Sains dan Matematik dalam Bahasa Inggeris (PPSMI) akan dikemukakan kepada Kabinet dalam tempoh sebulan dari sekarang. Menteri Pelajaran, Datuk Seri Hishammuddin Tun Hussein berkata, pihaknya perlu membuat kajian terperinci termasuk menerima maklum balas daripada kementerian lain sebelum membentangkannya ke jemaah menteri.

Beliau juga menegaskan, keputusan Kabinet mengenai PPSMI tidak ada kaitan dengan tiga pilihan raya kecil bulan depan atau pemilihan dalam Perhimpunan Agung UMNO hujung bulan ini. "Satu memorandum telah diedarkan kepada semua kementerian untuk mereka membuat ulasan dan pandangan berhubung dasar PPSMI. "Kabinet akan membuat keputusan selepas kita mengemukakan laporan yang diperoleh daripada semua kementerian yang dijangka selesai dalam bulan ini juga," katanya.

Beliau berkata demikian kepada pemberita selepas mengadakan pertemuan tertutup dengan Menteri Besar Pahang, Datuk Seri Adnan Yaakob di Kediaman Rasmi Menteri Besar di sini hari ini. Beliau mengulas arahan Datuk Seri Abdullah Ahmad Badawi yang mahu isu PPSMI diselesaikan segera selepas berlaku kekecohan dalam perhimpunan anjuran Gerakan Memansuh PPSMI (GMP) di ibu negara baru-baru ini. Hishammuddin menegaskan, beliau telah menemui Perdana Menteri dan memberi penjelasan berhubung perkembangan kajian yang dijalankan oleh kementeriannya. Tegas beliau, keputusan untuk memansuhkan atau meneruskan dasar itu tidak boleh dilakukan sewenang-wenangnya kerana banyak pihak yang terlibat dalam pelaksanaannya.

Beliau berkata, sejak dasar itu dilaksanakan pada 2003, seramai 6.1 juta pelajar dan 126,000 guru terlibat manakala RM3 bilion dilaburkan oleh kerajaan. "Para pejuang bahasa mungkin tidak perasan dengan isu-isu yang membabitkan pelajar, guru dan peruntukan yang dilaburkan oleh kerajaan sejak 2003 ini," katanya.

Beliau bagaimanapun mengakui keikhlasan pejuang bahasa terutama Datuk Dr. Hassan Ahmad dan Datuk A. Samad Said yang berjuang untuk memansuhkan dasar PPSMI. Katanya, beliau bersedia bertemu dengan mereka tetapi dengan syarat bahawa kekecohan yang berlaku di ibu negara baru-baru ini tidak berulang.

**12 Mac 2009 (Khamis)**

### **Pembiayaan pakej rangsangan dari sumber dalam negara**

KUALA LUMPUR 12 Mac - Datuk Seri Najib Tun Razak menjelaskan, kerajaan mampu untuk mendapatkan pinjaman dari dalam negeri bagi membiayai Pakej Rangsangan Kedua bernilai RM60 bilion kerana sistem kewangan negara mempunyai kecairan sebanyak RM250 bilion. Timbalan Perdana Menteri menegaskan, jumlah peruntukan RM60 bilion ini bukan rekaan, sebaliknya akan menjadi kenyataan kerana ia mampu dibiayai melalui sumber dalam negara. "Buat permulaan pembiayaan pakej ini akan dimulakan dengan Bon Simpanan Kerajaan berasaskan syariah bernilai RM5 bilion yang menawarkan kadar faedah sebanyak lima peratus setahun. "Pembiayaan untuk projek-projek dalam pakej rangsangan kedua ini akan diperoleh secara beransur-ansur selaras dengan pelaksanaan projek-projek yang telah diluluskan," katanya.

Beliau berkata demikian ketika menggulung perbahasan Pakej Rangsangan Kedua pada sidang Dewan Rakyat hari ini. Najib mengulas mengenai kesangsian yang dilontarkan oleh ahli-ahli Parlimen pembangkang sambil menegaskan bahawa RM60 bilion itu bukan sebagai satu angka rekaan, tetapi ia akan menjadi kenyataan. Tambahnya, pakej rangsangan kedua itu juga akan dapat membina keyakinan dalam kalangan institusi-institusi kewangan kerana kerajaan menjamin 80 peratus daripada jumlah pinjaman modal kerja kepada syarikat-syarikat yang layak. Najib memberitahu, defisit fiskal yang berada pada paras 7.6 peratus pada tahun ini tidak akan menjaskan penarafan kewangan negara kerana ia merupakan satu perkara biasa dalam kegawatan ekonomi yang mana defisit adalah lebih tinggi. "Defisit ini hanya dalam jangka masa pendek sahaja dan kerajaan mempunyai rekod baik menurunkan defisit ini umpamanya pada tahun 2002 defisit fiskal negara ialah sebanyak 5.3 peratus, tetapi ia dapat dikurangkan kepada 3.2 peratus pada tahun 2007," katanya.

**12 Mac 2009 (Khamis)**

### **Jawatankuasa pemantauan ditubuh**

KUALA LUMPUR 12 Mac - Satu jawatankuasa pemandu ditubuhkan untuk memantau dan memastikan kedua-dua pakej rangsangan ekonomi masing-masing bernilai RM7 bilion dan RM60 bilion dilaksanakan mengikut tempoh yang ditetapkan. Jawatankuasa itu dipengerusikan oleh Timbalan Perdana Menteri, Datuk Seri Najib Tun Razak.

Najib ketika mengumumkan penubuhan jawatankuasa itu berkata, penilaian pelaksanaan projek di bawah pakej rangsangan itu dibuat berdasarkan petunjuk prestasi utama (KPI) sebagai penanda aras pelaksanaan dalam tempoh yang ditetapkan. "Ia juga bagi memastikan projek-projek itu dapat memberi manfaat dalam jangka waktu yang pendek kepada rakyat dan negara,'

katanya ketika menggulung perbahasan Rang Undang-Undang Perbekalan Tambahan 2009 pada sidang Dewan Rakyat hari ini.

Beliau yang juga Menteri Kewangan berkata, jawatankuasa pemandu itu dianggotai oleh Menteri Kewangan Kedua, Tan Sri Nor Mohamed Yakcop; Menteri di Jabatan Perdana Menteri, Tan Sri Amirsham A. Aziz yang bertanggungjawab terhadap Unit Perancangan Ekonomi; dan Ketua Setiausaha Negara, Tan Sri Mohd. Sidek Hassan.

Kata Najib, pihaknya akan berunding dengan jawatankuasa teknikal kementerian yang diketuai Ketua Setiausaha Kementerian Kewangan, Tan Sri Dr. Wan Abd. Aziz Wan Abdullah dan anggota-anggota Unit Pengurusan Projek untuk mendapatkan maklumat mengenai pelaksanaan projek di bawah pakej rangsangan ini. "Jawatankuasa teknikal pula diarah bermesyuarat setiap minggu bagi meneliti perkembangan pelaksanaan projek-projek yang dijalankan dalam pakej rangsangan pertama dan kedua," katanya.

Najib memberitahu, penubuhan jawatankuasa itu merupakan mekanisme baru yang akan memberi keyakinan kepada rakyat bagi memastikan perbelanjaan peruntukan dalam pakej rangsangan pertama. Katanya, ini termasuk projek-projek yang dilaksanakan dalam pakej rangsangan kedua akan dapat mencapai sasaran. Jawatankuasa tersebut juga, katanya, mempunyai kuasa untuk campur tangan di mana perlu bagi memastikan projek-projek yang dilaksanakan mencapai sasaran. Ujar beliau, penubuhan jawatankuasa itu juga adalah saranan ahli-ahli Parlimen semasa membahaskan pakej rangsangan tersebut mengenai pelaksanaannya

## **12 Mac 2009 (Khamis)**

### **Kajian dasar PPSMI dibentang sebelum akhir Mac**

KUANTAN 12 Mac — Menteri Pelajaran Datuk Seri Hishammuddin Tun Hussein berkata hasil kajian mengenai dasar Pengajaran dan Pembelajaran Sains dan Matematik dalam Bahasa Inggeris (PPSMI) dijangka dibentangkan ke kabinet sebelum berakhir bulan ini. Beliau berkata kementeriannya perlu membuat kajian terperinci termasuk menerima maklumbalas daripada kementerian lain sebelum membentangkannya ke jemaah menteri.

"Kementerian Pelajaran telah mengedarkan memorandum mengenai PPSMI kepada semua kementerian yang terlibat untuk diberikan ulasan, bergantung kepada kementerian (lain) kembalikan ulasan mereka sebelum kita bawa ke Jemaah Menteri, saya rasa bulan ini juga," katanya kepada pemberita selepas mengadakan perjumpaan tertutup dengan Menteri Besar Pahang Datuk Seri Adnan Yaakob di sini, hari ini. Hishammuddin berharap semua pihak bersabar kerana kajian itu memerlukan tempoh tertentu dan ia melibatkan soal dasar. "Cohort penentu kepada PPSMI ialah cohort pertama yang melalui enam tahun PPSMI iaitu yang mengambil Ujian Penilaian Sekolah Rendah (UPSR) tahun lepas, dan keputusan UPSR 2008 baru dua setengah bulan diumumkan (hujung tahun lepas)," katanya.

Beliau berkata semua pihak perlu rasional apabila memperkatakan isu itu tanpa melibatkan emosi atau mempolitikkannya. "Kalau kita hendak membuat perubahan kepada dasar ini, kita perlu mengambil kira seramai 6.1 juta pelajar yang telah melalui dasar PPSMI, 126,000 guru-guru terlibat dan jumlah hampir RM3 billion yang kita laburkan dalam melaksanakan dasar ini, jadi ianya bukan satu perkara yang perlu dengan sewenangnya membuat keputusan," katanya.

Hishammuddin berkata beliau juga telah mengadakan perbincangan dengan Perdana Menteri Datuk Seri Abdullah Ahmad Badawi dan Timbalan Perdana Menteri Datuk Seri Najib Tun Razak berhubung perkara itu. "Ada yang kata kita lambat buat kajian mengenai dasar ini, saya ingin menjelaskan bahawa dasar ini diperkenalkan pada 2003, dan cohort pertama baru saja mendapat keputusan UPSR hujung tahun lepas, kira-kira dua bulan setengah, tempoh dua bulan setengah itu sebenarnya bukan satu tempoh yang panjang (lama)," katanya.

Beliau juga amat berharap pejuang-pejuang bahasa tidak mempolitikkan perkara itu sebaliknya turut sama memberikan idea yang lebih berasas daripada mengadakan demonstrasi jalanan yang 'ternyata telah dipolitikkan pihak tidak bertanggungjawab'.

## **13 Mac 2009 (Jumaat)**

### **LCCT dibina pertengahan 2009**

Oleh DALIZA ARIFFIN [daliza.ariffin@utusan.com.my](mailto:daliza.ariffin@utusan.com.my)

PETALING JAYA 13 Mac - Malaysia Airports Holdings Bhd. (MAHB) akan membiayai sendiri projek pembinaan Terminal Penerbangan Tambang Murah (LCCT) bernilai RM2 bilion yang akan dibina di Lapangan Terbang Antarabangsa Kuala Lumpur (KLIA). Pengarah Urusan dan Ketua Pegawai Eksekutif Malaysia Airports Holdings Bhd. Datuk Seri Bashir Ahmad berkata, pembiayaan tersebut telah dimuktamadkan melalui surat tawaran yang diterimanya baru-baru ini.

"Buat masa sekarang kami tidak memiliki hutang dan kami yakin ia tidak akan memberi sebarang masalah kepada kami (permohonan pinjaman), malah kami telah menerima surat tawaran mengenainya. "Peruntukan sebanyak RM2 bilion untuk membangunkan LCCT yang diumumkan oleh kerajaan dalam bajet mini baru-baru ini adalah nilai pelaburan yang kami 'sumbangkan' dalam pakej rangsangan itu," katanya pada sidang akhbar, di sini hari ini.

Bashir menjelaskan bahawa, projek yang akan terletak di sebelah barat terminal utama KLIA itu dijangka bakal menjadi terminal penerbangan murah termoden di rantau ini kerana terminal seluas 150,000 meter persegi bakal memiliki kapasiti sehingga 30 juta penumpang setahun. Malah, MAHB turut memperuntukkan kawasan bersebelahannya yang telah dirizabkan untuk projek pengembangan masa depan yang memiliki kapasiti lebih 45 juta penumpang setahun pada masa depan.

Selain, ia juga akan mempunyai bangunan bertingkat yang memiliki 6,000 ruang letak kenderaan, 70 ruang tempat meletak pesawat dan untuk keselesaan orang ramai, ia akan dihubungkan dengan kemudahan kereta api laju (ERL) sejauh 1.5 kilometer daripada terminal utama KLIA. Sehubungan itu, MAHB telah berbincang dengan operator ERL mengenai cadangan memanjangkan kemudahannya ke LCCT baru tetapi sebarang keputusan mengenai cadangan untuk menurunkan kadar tambangnya adalah tertakluk kepada keputusan kerajaan.

Bashir menjelaskan projek pembinaan itu akan dimulakan pada pertengahan tahun ini dan ia akan beroperasi sepenuhnya menjelang suku ketiga tahun 2011. "Tiada tekanan bagi kami untuk menyiapkan projek tersebut dalam tempoh yang ditetapkan malah kami yakin ia boleh disiapkan dalam tempoh dua setengah tahun," jelasnya.

Selain itu, ditanya tentang kemudahan yang dicadangkan oleh AirAsia sebelum ini tetapi berkemungkinan tidak dapat disediakan oleh MAHB, Bashir menegaskan apa yang bakal ditawarkan melebihi apa yang dicadangkan oleh AirAsia Bhd. (AirAsia) sebelum ini. "Kami menyediakan lebih daripada apa yang mereka minta kerana fokus kami adalah besar tetapi sekiranya ia (cadangan) tidak masuk akal maka kami tidak dapat memenuhinya. "Namun, apa yang diminta mereka adalah normal seperti syarikat penerbangan lain," ujarnya.

Sementara itu, beliau menjelaskan LCCT baru ini tidak akan menawarkan kemudahan jejantas udara kepada penumpangnya kerana ia adalah kehendak AirAsia. Namun, kemudahan tersebut mungkin akan ditawarkan kepada syarikat penerbangan tambang murah lain yang memerlukannya terutama bagi pesawat perjalanan jarak jauh. Buat masa sekarang, selain AirAsia, dua syarikat penerbangan lain yang akan beroperasi di LCCT baru ini adalah Tiger Airlines dan Cebu Pacific. "Mungkin ada juga syarikat penerbangan tambang murah lain yang akan beroperasi di sini pada masa depan, tetapi kami mahu menegaskan di sini bahawa LCCT baru ini juga terbuka kepada syarikat bukan penerbangan tambang murah semata-mata,"ujarnya.

Ditanya mengenai kadar cukai lapangan terbang bagi LCCT, ia akan diputuskan oleh kerajaan, manakala kadar yuran yang dikenakan kepada pesawat yang mendarat dan berlepas pula adalah sama bergantung kepada landasan yang digunakan.

**13 Mac 2009 (Jumaat)**

**Mendap: JKR diminta segerakan kajian**



Rohana Ibrahim menunjukkan kawasan berlakunya mendapan dan gelinciran tanah di bawah Blok B Pangsapuri Nusa Kurnia, Taman Bukit Pandan, Ampang.

AMPANG 13 Mac - Penduduk pangsapuri Nusa Kurnia, Taman Bukit Pandan di sini berharap Jabatan Kerja Raya (JKR) yang menjalankan kajian terhadap mendapan yang berlaku di pangsapuri itu dapat mengumumkan hasil kajian itu dengan segera. Mereka kini semakin bimbang dengan tahap keselamatan dan kekuahan pangsapuri itu berikutan keadaan cuaca yang sentiasa basah ketika ini. Penduduk mendakwa pangsapuri yang menempatkan 200 unit rumah di tiga blok itu mengalami masalah pemendapan tanah di Blok A dan B. Air dapat dilihat mengalir keluar dari tanah di bawah blok berkenaan yang mengakibatkan pemendapan berlaku.

Tinjauan *Utusan Malaysia* ke Blok B pangsapuri itu mendapati keadaan agak membimbangkan kerana selain terdapat tanah mendap, terdapat juga tanah yang pecah di bawah blok tersebut. Lebih memburukkan lagi, tembok penghadang tebing bangunan tersebut turut pecah akibat mendapan itu. Penduduk mendakwa, mendapan tanah itu berlaku akibat sistem perparitan yang tidak sistematik yang dilakukan oleh pemaju pangsapuri berkenaan. Mereka bimbang risiko tragedi tanah runtuh akan berulang sekiranya masalah ini tidak ditangani segera dan dari peringkat awal.

Pengerusi persatuan penduduk pangsapuri itu, Zamri Umar berkata, penduduk masih lagi menunggu keputusan daripada JKR berhubung masalah itu. "Pihak JKR telah melakukan pemeriksaan tanah baru-baru ini dan maklumat awal yang diberitahu ialah struktur bangunan tersebut tidak mempunyai masalah. "Bagaimanapun, JKR mahu menjalankan siasatan lanjut berhubung perkara tersebut," katanya ketika dihubungi *Utusan Malaysia* di sini.

Beliau berkata, kejadian itu sebenarnya telah lama berlaku, malah pihaknya pernah mengajukan masalah tersebut kepada Majlis Perbandaran Ampang Jaya (MPAJ) tahun lalu. Namun, katanya, maklum balas yang diterima ialah MPAJ meminta pihak penduduk melantik pihak yang pakar untuk menilai keadaan sebenar di pangsapuri itu. "Penduduk juga diminta menggunakan kos sendiri kerana pihak pemaju yang bertanggungjawab terhadap pangsapuri ini telah gulung tikar," katanya.

Bagaimanapun, katanya, penduduk berasa lega apabila Exco Perumahan, Pengurusan Bangunan dan Setinggan Negeri Selangor, Iskandar Abdul Samad dan Ahli Dewan Undangan Negeri (ADUN) Teratai, Jenice Lee mengadakan lawatan dan mengarahkan pihak berkuasa membuat kajian. "Hasilnya, pihak MPAJ dan JKR bersama-sama bertanggungjawab menjalankan siasatan berhubung perkara ini," katanya.

Sementara itu, seorang penduduk, **Rohana Ibrahim**, 37, berharap masalah itu tidak serius dan dapat diselesaikan dengan segera supaya penduduk tidak lagi merasa bimbang. Namun, katanya, sekiranya keputusan kajian mendapat pangaspuri tersebut tidak selamat, penduduk akan akur jika diarahkan berpindah dikeluarkan. "Apa yang lebih penting adalah keselamatan penduduk di pangaspuri ini," katanya ketika ditemui *Utusan Malaysia* di sini.

Seorang lagi penghuni, **Muhd. Tahir Muhd. Arif**, 68, berkata, tindakan segera perlu diambil supaya kejadian seperti di Bukit Antarabangsa tidak berulang. Dia yang juga penasihat pangaspuri tersebut menambah, nyawa penduduk di pangaspuri itu akan terancam sekiranya tidak ada tindakan konkrit diambil secepat mungkin.

## 14 Mac 2009 (Sabtu)

### 3,000 penanam tembakau dibantu

Oleh TOREK SULUNG [utusankelantan@utusan.com.my](mailto:utusankelantan@utusan.com.my)

PASIR PUTEH 14 Mac – Kementerian Perusahaan Utama dan Komoditi memberi jaminan untuk membantu 3,000 penanam tembakau di Kelantan yang mengalami kerugian besar apabila tanaman tembakau yang diusahakan musnah akibat banjir kilat pada 1 hingga 3 Mac lalu. Timbalan Menterinya, Senator A. Kohilan Pillay berkata, Kerajaan Pusat dengan kerjasama Lembaga Tembakau dan Kenaf Negara (LTKN) serta semua syarikat pengilang rokok bersetuju untuk membantu penanam terbabit dengan program tanam semula bermula pada 20 April ini.

Beliau berkata, suntikan bantuan berjumlah RM20 juta itu akan disalurkan kepada penanam bagi membolehkan kerja-kerja tanam semula melibatkan proses mencabut pokok, membajak dan baja dapat ditampung tanpa membebankan mereka. "Hasil lawatan dan tinjauan ke tapak penanaman tembakau mendapat kemusnahannya adalah besar dengan melibatkan kawasan seluas 2,800 hektar. "Tenaga dan kesungguhan penanam selama 50 hari kerja bercucuk tanam tidak mendapat sebarang pulangan disebabkan bencana alam dan hujan lebat yang berterusan itu," katanya.

Beliau berkata demikian kepada pemberita selepas mengadakan perjumpaan dengan penanam tembakau di Jelapang Tembakau Kampung Ayer Tawar dan Pak Makyong, dekat sini semalam. Hadir sama pada majlis itu, Pengarah LTKN, Teo Hui Bek dan Pengarah Operasi British American Tobacco (BAT), Datuk Chan Choon Ngai.

Isnin lalu, akhbar melaporkan penanam tembakau di kawasan tersebut mengalami kerugian kira-kira RM23 juta akibat banjir kilat selama tiga hari yang membabitkan kawasan seluas 1,500 hektar kawasan tanaman tembakau di jajahan ini minggu lalu. Pillay berkata, bantuan yang dihulurkan masih tidak setimpal dengan kerugian yang ditanggung oleh penanam tetapi ia adalah sebahagian pembelaan kerajaan dan syarikat pengilang rokok kepada mereka.

Beliau berkata, kementerian juga akan turut menimbang dan mengkaji semula permintaan penanam yang meminta supaya pinjaman kredit bahan input sepanjang penanaman musim pertama yang musnah itu dihapus kira secara menyeluruh di samping menyalurkan bantuan kewangan secara percuma bagi program tanam semula. Katanya, permintaan itu akan ditimbang sewajarnya kerana ianya melibatkan bajet yang agak besar dan perlu dilihat dari aspek sumber kewangan secara teliti. Sementara itu, Choon Ngai berkata, BAT bersetuju menyalurkan bantuan sebanyak RM10 juta bagi menjayakan penanaman semula yang melibatkan 1,000 keluarga.

## **14 Mac 2009 (Sabtu)**

### **Penantian 20 tahun miliki tanah tercapai**

TAPAH 14 Mac – Penantian lebih 20 tahun untuk memiliki tanah berbaloi apabila Pejabat Tanah dan Daerah Batang Padang memberikan geran hak milik kepada 43 daripada 180 peserta Rancangan Perumahan Tersusun (RPT) Taman Merdeka, Kampar dekat sini. Pengerusi Jawatankuasa Kerajaan Tempatan dan Hal Ehwal Pengguna, Dr. Mah Hang Soon berkata, lot tanah itu diluluskan semasa pemerintahan kerajaan Barisan Nasional (BN) sejak 2004.

“Pemberian geran kepada pemilik tanah ini tertangguh selepas kerajaan negeri diperintah oleh pakatan pembangkang. “Baki penduduk RPT akan menerima geran hak milik tidak lama lagi apabila semua proses diselesaikan,” katanya kepada pemberita di Pejabat Daerah dan Tanah Batang Padang di sini semalam.

Hang Soon yang juga Ahli Dewan Undangan Negeri (ADUN) Chenderiang berkata, pemberian tanah kepada rakyat membuktikan kerajaan BN sentiasa memahami masalah yang dihadapi rakyat untuk memiliki tanah. Katanya, kerajaan negeri akan memastikan rakyat yang menduduki tanah kerajaan dapat diberikan hak milik demi masa depan mereka.

Sementara itu, Pegawai Daerah Batang Padang, Datuk Md. Damiri Sairi berkata, RPT itu melibatkan kawasan seluas 13.9 hektar yang mengandungi 243 lot tanah. Menurut beliau, punca kelewatan memproses hak milik tanah itu yang memakan masa antara 10 hingga 18 tahun kerana ia menghadapi pelbagai masalah melibatkan pembahagian lot tanah. “Kita akan memastikan pembahagian dibuat secara adil kepada mereka yang layak dan sebanyak 10 projek RPT telah diselesaikan di daerah ini sejak 2005,” katanya.

**15 Mac 2009 (Ahad)**

## **Dua sasaran PIN gagal capai objektif**

Oleh ROHANI IBRAHIM pengarang@utusan.com.my

KUALA LUMPUR 15 Mac - Dua daripada lima sasaran bagi fasa pertama pelaksanaan Pelan Integriti Nasional (PIN) 2004-2008 gagal mencapai objektif yang diharapkan. Kedua-dua sasaran PIN berkenaan:

Sasaran keempat - memantapkan institusi keluarga dan komuniti.

Sasaran kelima - memantapkan institusi keluarga dan komuniti serta meningkatkan kualiti hidup dan kesejahteraan rakyat.

Presiden Institut Intergriti Malaysia (IIM), Datuk Dr. Mohd. Tap Salleh berkata, sasaran keempat dianggap tidak mencapai objektif berikutan peningkatan kes cerai, dera dan sumbang mahram di seluruh negara sejak kebelakangan ini. "Malah, kajian IIM juga mendapat 20 peratus daripada keluarga di Malaysia jarang makan bersama dan 20 peratus ibu bapa tidak mengambil tahu mengenai anak remaja mereka yang sering keluar malam," katanya kepada *Utusan Malaysia* di sini hari ini.

Bagi mengatasi masalah ini, tambah beliau, cadangan mewujudkan kursus keibubapaan selepas lima atau 10 tahun usia perkahwinan akan dikaji. "Ibu bapa harus diberikan kesedaran dan bimbingan tentang bagaimana sebuah keluarga patut berhadapan dengan krisis ekonomi dan sebagainya," katanya.

Sementara itu, tambah beliau, bagi sasaran kelima iaitu meningkatkan kualiti hidup dan kesejahteraan masyarakat, ia dianggap kurang memuaskan ekoran peningkatan kes jenayah, kemalangan jalan raya dan kes melibatkan alam sekitar seperti tanah runtuh. "Daripada 27 juta penduduk Malaysia, 6,200 kematian ekoran kes kemalangan dicatatkan setiap tahun.

"Ini merupakan jumlah yang tinggi memandangkan di United Kingdom daripada 60 juta penduduknya kematian akibat kemalangan jalan raya hanyalah 6,000 setahun," kata Mohd. Tap. Justeru, tambahnya, masyarakat Malaysia perlu dididik mengenai etika ketika di jalan raya selain memainkan peranan aktif dalam komuniti dengan melibatkan diri dalam Rukun Tetangga dan tidak hanya menyerahkan tanggungjawab membanteras jenayah kepada polis.

Kata Mohd. Tap, sasaran yang mencatatkan pencapaian terbaik ialah sasaran pertama iaitu mengurangkan gejala rasuah, penyelewengan dan salah guna kuasa. "Ini dapat dilihat daripada peningkatan penangkapan dan siasatan kes rasuah sejak kebelakangan ini. "Malah, penubuhan Suruhanjaya Pencegahan Rasuah Malaysia (SPRM) turut mendapat pujian daripada agensi antirasuah Hong Kong dan Australia," katanya.

Tambah beliau, sasaran kedua dan ketiga iaitu meningkatkan kecekapan dalam sistem penyampaian perkhidmatan awam serta meningkatkan tadbir urus korporat turut mencatatkan peningkatan positif.

PIN dilancarkan pada 23 April 2004 oleh Perdana Menteri, Datuk Seri Abdullah Ahmad Badawi serentak dengan pelancaran IIM. Laporan Tekad 2008 iaitu pencapaian fasa pertama PIN akan dibentangkan kepada Perdana Menteri minggu ini.

**15 Mac 2009 (Ahad)**

### **Faedah pinjaman pendidikan Perkeso kini 2 peratus**

SUNGAI PETANI 15 Mac - Faedah bayaran balik pinjaman pendidikan Pertubuhan Keselamatan Sosial (Perkeso) dikurangkan daripada empat peratus kepada dua peratus berkuat kuasa Februari lalu.

Menteri Sumber Manusia, Datuk Dr. S. Subramaniam berkata, pengurangan faedah pinjaman tersebut dibuat selepas kerajaan mengambil kira peningkatan kos sara hidup yang meningkat di kalangan rakyat akibat kemelesetan ekonomi. Bagaimanapun, katanya, pengurangan berkenaan hanya tertakluk kepada peminjam baru. "Dengan penurunan kadar caj ini, kita berharap ia dapat meringankan beban pelajar terutama yang menghadapi masalah peningkatan kos pengajian di institusi pengajian tinggi sekarang," katanya.

Beliau berkata demikian kepada pemberita selepas menyampaikan cek bantuan faedah caruman dan pinjaman pendidikan Perkeso di Dewan Sekolah Menengah Teknik 2 Sungai Petani, di sini hari ini.

Menurut Subramaniam, kerajaan juga bersetuju mengehadkan jumlah pinjaman pendidikan Perkeso kepada anak penerima faedah caruman tabung berkenaan kepada RM100,000 setiap seorang berkuat kuasa serta-merta. "Keputusan ini dibuat selepas mengambil kira kos pendidikan yang ditanggung sekarang termasuk bagi kursus melibatkan perbelanjaan tinggi seperti kejuruteraan dan perubatan," jelasnya.

Beliau berkata, sejak diperkenalkan pada tahun 1997, Perkeso telah meluluskan pinjaman pendidikan berjumlah RM95.5 juta kepada 3,675 anak penerima faedah caruman tabung berkenaan. Katanya, bagaimanapun hanya 51 peratus daripada mereka membayar balik pinjaman tersebut sementara 49 peratus lagi tidak berbuat demikian.

"Berikutan itu, kementerian sedang berusaha mendapatkan kembali pinjaman yang diberikan termasuk berunding dengan Kementerian Kewangan bagi membolehkan potongan gaji terus dibuat apabila mereka mendapat pekerjaan," katanya.

**15 Mac 2009 (Ahad)**

### **Kajian LCCT baru profesional**

SUBANG 15 Mac - "Kami tidak 'lembap' membuat keputusan tetapi kajian (Terminal Penerbangan Tambang Murah - LCCT) yang dilaksanakan itu dibuat secara profesional," kata Pengarah Urusan dan Ketua Pegawai Eksekutif Malaysia Airports Holdings Bhd. (MAHB), Datuk Seri Bashir Ahmad. Menurutnya, kajian itu bukan sengaja dilengah-lengahkan tetapi ia disandarkan kepada pelan induk lapangan terbang kebangsaan. Namun, kata beliau, kajian tersebut telah mengambil masa selama 16 bulan untuk disiapkan dan tarikh akhirnya adalah pada bulan Disember tahun lalu.

Menurutnya, keputusan tersebut telah diserahkan kepada kerajaan dan pemilihan tapak untuk membangunkan LCCT di Lapangan Terbang Antarabangsa Kuala Lumpur (KLIA) tidak boleh dilaksanakan secara tergesa-gesa. "Keputusan itu dibuat berdasarkan kepada perbincangan dan perundingan, kami bukan sengaja melengah-lengahkannya tetapi kajian itu dilaksanakan secara profesional," katanya pada sidang akhbar mengumumkan mengenai pembinaan LCCT baru di KLIA, baru-baru ini.

Beliau diminta mengulas mengenai sama ada isu pembinaan KLIA-East LCCT-Labu yang telah dicadangkan oleh AirAsia yang menarik perhatian rakyat menyebabkan MAHB mempercepatkan proses pembinaan projek berkenaan. Sebelum ini, AirAsia mendakwa syarikat pengendali lapangan terbang itu lambat respons terhadap pertumbuhan pesat penumpangnya yang dijangka bakal bertambah sehingga 15 juta penumpang menjelang 2010 manakala terminal yang akan dimajukan oleh MAHB hanya akan siap menjelang tahun 2014. Isu itu turut mengheret syarikat konglomerat Sime Darby Bhd. (Sime Darby) untuk terlibat dalam projek berkenaan. "Ini tidak bermakna kami tidak memberi tumpuan kepada apa yang dicadangkan oleh AirAsia tetapi ia tertakluk kepada kajian yang dijalankan," tambahnya.

Bashir menjelaskan bahawa, pada 20 Ogos 2007, kerajaan telah memberi kelulusan kepada syarikat kerjasama antara Netherlands Airports Consultants BV (NACO) dan KLIA Consultancy Services (KLIACS) untuk melaksanakan pelan induk lapangan terbang tersebut. Pelan induk itu bertujuan untuk menyediakan rangka kerja strategik dengan pelan pembangunan tersusun bagi 24 buah lapangan terbang di Malaysia untuk tempoh 50 tahun akan datang dan ini termasuk pelan pembangunan bagi LCCT.

**16 Mac 2009 (Isnin)**

### **Peruntukan RM10 bilion bersih Sungai Klang**

SHAH ALAM 16 Mac - Kerajaan negeri Selangor memperuntukkan RM10 bilion untuk kerja-kerja pembersihan Sungai Klang bagi menggalakkan pertumbuhan pembangunan dan pelaburan di

kawasan tanah rezab sungai itu. Menteri Besar, Tan Sri Abdul Khalid Ibrahim berkata, sungai itu juga bakal dijadikan kawasan pengangkutan alternatif bagi penduduk berulang-alik dari bandar selain tempat riadah dan pelancongan. Katanya, kos yang diperuntukan itu antara lainnya melibatkan kerja-kerja pemindahan bahan pencemaran dan penggalian bahan mendapan dari dasar sungai sepanjang 120 kilometer.

"Bahagian kuala dan hulu Sungai Klang merupakan dua projek terawal yang akan dilaksanakan bagi pembersihan sungai dalam tempoh terdekat ini dan dijangka siap dalam tempoh dua tahun. "Jika projek ini siap sepenuhnya, kita jangka nilai pelaburan di kawasan rezab yang bakal diperoleh berjumlah RM5 bilion," katanya kepada pemberita selepas sidang Dewan Undangan Negeri (DUN) di sini hari ini.

Sungai Klang menganjur dari hulunya di Banjaran Gunung Titiwangsa merentasi kawasan tadahan Empangan Klang Gate, Empangan Batu dan kawasan Ampang yang menyempadani negeri Pahang. Dalam perkembangan berkaitan, Abdul Khalid ketika menggulung titah Sultan Selangor berkata, kerja-kerja pembersihan di sepanjang Sungai Klang itu yang akan dimulakan tahun depan dijangka siap sepenuhnya pada 2030. "Pembanyaannya dijangka daripada sumber para pelabur persendirian yang mempunyai pengalaman dan kepakaran dalam kerja pembersihan sungai," jelas beliau.

Mengenai cadangan untuk memanjangkan laluan Sistem Transit Aliran Ringan (LRT) ke kawasan seperti Klang, Kajang dan Rawang, Abdul Khalid berkata, ia bertujuan untuk meningkatkan sistem pengangkutan awam berbanding kenderaan persendirian. Ujar beliau, pihaknya akan bertemu dan mendengar taklimat pelabur dari Jerman minggu depan untuk membincangkan pelaksanaan sistem tersebut.

## **17 Mac 2009 (Selasa)**

### **2,,359 struktur haram sudah dimusnah**

KOTA KINABALU 17 Mac - Dewan Bandaraya Kota Kinabalu (DBKK) merobohkan sebanyak 2,359 buah rumah dan struktur haram di sekitar bandar ini, Inanam, Likas dan Menggatal sejak tiga tahun lalu. Pegawai Perhubungan Awamnya, Syron A. Tunggolou berkata, jumlah rumah yang diroboh oleh DBKK itu menunjukkan peningkatan setiap tahun. Katanya, berdasarkan statistik dari 2006 hingga 2008, jumlah rumah yang diroboh oleh DBKK sepanjang tahun lalu adalah yang tertinggi iaitu sebanyak 1,121. "Pada 2006, hanya 287 rumah dan struktur haram dirobohkan. Bagaimanapun, jumlah itu meningkat tiga kali ganda pada 2007 iaitu 951 buah," katanya kepada *Utusan Malaysia* baru-baru ini.

Beliau menambah, sehingga akhir Januari tahun ini, sebanyak 75 buah rumah dan struktur haram telah dirobohkan. Syron berkata, keseluruhan struktur yang diroboh itu termasuk bilik-bilik haram yang berleluasa di bandar raya Kota Kinabalu dan penempatan setinggan. Katanya,

sebelum tindakan meroboh dilakukan DBKK akan memberikan notis tiga bulan kepada pemilik-pemilik rumah atau bangunan berkenaan.

Jelasnya, kehadiran pendatang asing tanpa izin (PATI) di ibu negeri yang menjadi buruh kasar menjadi faktor peningkatan jumlah pembinaan struktur haram ini. "Kebanjiran PATI ini dikenal pasti mendorong pemilik-pemilik rumah atau bangunan membina struktur haram meskipun sudah diberikan amaran oleh DBKK," ujarnya.

Sehubungan itu, katanya, DBKK tidak akan teragak-agak mengambil tindakan tegas dengan membawa mereka yang degil ke mahkamah kerana melanggar undang-undang.

## **18 Mac 2009 (Rabu)**

### **Sasar 507,558 tan metrik ikan 2010**

GERIK 18 Mac - Kementerian Pertanian dan Industri Asas Tani menasarkan 507,558 tan metrik ikan menjelang tahun 2010 bagi menampung permintaan domestik sumber bekalan itu yang semakin meningkat setiap tahun. Menterinya, Datuk Mustapa Mohamed berkata, bagi mencapai sasaran berkenaan, Jabatan Perikanan telah menjalankan pelbagai program termasuk sebanyak 49 Projek Berimpak Besar Zon Industri Akuakultur (HIP-AIZ) di seluruh negara. Katanya, perairan Tasik Temengor seluas kira-kira 18,128 hektar di daerah Hulu Perak telah dikenalpasti sebagai salah satu kawasan berpotensi untuk ternakan ikan air tawar.

"Jabatan Perikanan menasarkan untuk mengeluarkan sebanyak 507,558 tan metrik ikan menerusi aktiviti ternakan akuakultur. Dari pada jumlah itu, Perak dijangka menyumbang sebanyak 137,400 tan metrik ikan apabila Tasik Temengor dibangunkan dengan projek itu," katanya ketika melawat projek ikan itu di Tasik Temengor di sini baru-baru ini.

Mustapa berkata, projek berstatus HIP-AIZ di Tasik Temengor itu dengan pelaburan sebanyak RM35 juta meliputi kawasan tasik dan daratan seluas 230 hektar. Menurutnya, 100 hektar di kawasan di tasik itu akan dibangunkan sebagai kawasan ternakan menggunakan sistem sangkar bulat, manakala seluas 100 hektar lagi kawasan di Tasik Kening pula sebagai kawasan ternakan ikan tilapia.

Kata beliau, sebanyak 81 hektar kawasan daratan di Sungai Dala dekat Gerik pula akan dibangunkan sebagai pusat pembenihan, pusat penjagaan anak ikan (nurseri) serta kolam pembangunan induk ikan tilapia spesies *GenoMar Supreme*. Tambahnya, kawasan selebihnya akan dibangunkan untuk tempat pendaratan, stor makanan, tempat pembiakan dan kilang pemprosesan kepingan isi ikan. "Jabatan Perikanan telah menjadikan perairan Tasik Temengor sebagai salah satu kawasan zon industri akuakultur," katanya.

Beliau berkata, Syarikat Trapia Malaysia Sdn. Bhd. yang bekerjasama dengan sebuah syarikat dari Norway itu turut bercadang mendirikan sebuah kilang pemprosesan ikan tilapia. Terdahulu,

Mustapa diberi penghormatan untuk menekan suis mesin yang dicipta khas untuk memindahkan benih ikan tilapia yang diternak dalam sangkar di perairan Tasik Temengor. Ini merupakan projek ternakan ikan air tawar pertama di negara ini menggunakan sangkar bulat HDPE sebesar 20 meter diameter. Satu modul sangkar bulat berkenaan yang terdiri daripada 20 unit sangkar siap dibina dan dijangka bakal mengeluarkan hasil mulai bulan Jun atau Julai depan.

Mustapa berkata, projek berkenaan akan ditingkatkan secara berfasa kepada 10 modul dengan 200 unit sangkar dan dijangka mampu mencapai 25,000 tan metrik ikan tilapia setahun menjelang tahun 2012.

## **18 Mac 2009 (Rabu)**

### **LPP rancang usaha 6,000 hektar sawah**

PASIR MAS 18 Mac - Lembaga Pertubuhan Peladang (LPP) Kelantan merancang melaksanakan projek tanaman padi bersepadu melibatkan kawasan seluas lebih 6,000 hektar di negeri ini pada tahun ini. Pengarahnya, Md. Salim Sulaiman berkata, tanaman secara komersial itu melibatkan penyertaan 17 Pertubuhan Peladang Kawasan (PPK) dan lebih 3,500 pesawah. Katanya, penyertaan petani secara terancang dan memanfaatkan tanah terbiar melalui pemantauan PPK dapat membantu meningkatkan pengeluaran padi negara. "Tambahnya pula terdapat pelbagai insentif yang diberikan oleh kerajaan dalam menggalakkan petani untuk meningkatkan pengeluaran padi di kawasan masing-masing terlibat" katanya.

Beliau berkata demikian semasa berucap merasmikan Mesyuarat Agung Tahunan Unit Peladang Berkelompok 2009 Pertubuhan Peladang Kawasan Kangkong di sini hari ini. Hadir sama Pengurus Besar PPK Kangkong, Wan Mohd. Fokhri Ahamad dan Pengurusi PPK Kangkong, Mohd. Yaman Mohamad.

Menurut Md. Salim, musim sebelum ini, tujuh PPK telah memulakan projek tanaman berkelompok padi melibatkan 1,600 petani melibatkan kawasan seluas 3,500 hektar dengan purata hasil tiga setengah tan sehektar. Menurutnya, dalam projek tanaman padi berkelompok musim ini, pelbagai usaha menyuburkan tanah termasuk perkapurana serta meratakan tanah mampu meningkatkan pengeluaran. Selain itu, katanya, LPP juga mendapat peruntukan RM3 juta bagi membiayai pemilikan jentera untuk petani. "Peruntukan itu diluluskan kepada petani yang membuat permohonan untuk membeli termasuk traktor, alat penyembur dan peralatan lain yang digunakan untuk bersawah," ujarnya.

Sehubungan itu, beliau meminta PPK di seluruh negeri berusaha mendaftar lebih ramai ahli untuk bersama-sama melaksanakan projek tanaman ini.

**19 Mac 2009 (Khamis)**

### **156 syarikat ditarik balik AP akibat pelbagai kesalahan**

KUALA LUMPUR 19 Mac - Kementerian Perdagangan Antarabangsa dan Industri (MITI) memberitahu, sehingga kini sebanyak 156 syarikat telah ditarik balik Permit Import (AP) kerana pelbagai kesalahan. Antara kesalahan yang dikenal pasti ialah melanggar syarat-syarat AP dan menjualnya kepada pihak lain. Menterinya, Tan Sri Muhyiddin Yassin berkata, kementeriannya membuat pemeriksaan ketat bagi pengeluaran AP dengan membuat penilaian ke atas semua dokumen berkaitan termasuk mengadakan lawatan ke atas premis-premis perniagaan.

"Hanya syarikat yang benar-benar layak dan mematuhi syarat sahaja diberi peruntukan AP," katanya dalam jawapan bertulis kepada soalan **Wee Choo Keong (DAP-Wangsa Maju)** pada sidang Dewan Rakyat hari ini. Menurutnya, agihan peruntukan AP 2009 telah dibuat berdasarkan pada laporan audit dan penilaian rapi kementerian itu ke atas setiap penerima. Katanya, dasar AP terbuka yang diperkenalkan pada tahun 1970 adalah untuk menggalakkan bumiputera bergiat dalam sektor automotif melalui penjualan kereta import.

Kelulusan peruntukan AP terbuka bagaimanapun tertakluk pada syarat-syarat tertentu antaranya ekuiti syarikat hendaklah dipegang penuh oleh bumiputera; urusan perniagaan dijalankan oleh syarikat sendiri tanpa menggunakan orang tengah dan mempunyai bilik pameran yang perlu dikekalkan sehingga tempoh tamat.

**20 Mac 2009 (Jumaat)**

### **RM1.5j baik pulih kompleks**

Oleh BAZLI ABDUL RAHMAN [utusanperlis@utusan.com.my](mailto:utusanperlis@utusan.com.my)



TEMPAT pendaratan ikan di LKIM Kuala Perlis, Kangar ini juga akan diperbaharui dan dinaik taraf.

KANGAR 20 Mac - Kompleks Lembaga Kemajuan Ikan Malaysia (LKIM) Kuala Perlis di sini merupakan pelantar pendaratan ikan yang kedua terbesar di Malaysia. Salah satu daripada faktor kompleks itu mencapai status tersebut ialah kerana sebahagian daripada bot laut dalam Thailand turut mendaratkan hasil tangkapannya di situ. Namun begitu, Kompleks LKIM yang

dibina sejak 13 tahun lalu itu, kini semakin uzur dan perlu diperbaiki untuk disesuaikan dengan kehendak semasa pengguna. Setelah menerima tuntutan yang disertakan alasan kukuh oleh para pengguna terutama nelayan, ia mendorong kerajaan mengeluarkan perbelanjaan bagi memperelokkan lagi kompleks tersebut. Berikutan itu, kerajaan membelanjakan RM1.5 juta bagi membaik pulih Kompleks LKIM berkenaan mulai tahun ini juga.

Pengerusi Jawatankuasa Pertanian, Industri Asas Tani dan Pembangunan Koperasi Perlis, Sabry Ahmad berkata, langkah tersebut diambil untuk memenuhi kehendak semasa pengguna. Katanya, peruntukan berkenaan akan digunakan untuk memperbaiki pelbagai kemudahan asas utama di kompleks tersebut yang rosak. Beliau berkata, antara kerosakan yang perlu diperbaiki segera ialah jalan dalam kompleks tersebut dan juga menambah satu lagi tangki air di kompleks yang sama. "Selain itu, kita juga akan membaik pulih lantai pendaratan ikan, membina setor untuk menempatkan kotak-kotak ikan dan memperbaiki jeti lama di kompleks berkenaan. "Kerajaan juga akan memperbaiki pagar keselamatan sekeliling kompleks dan menambah meja menggredkan ikan," katanya kepada *Utusan Malaysia* di sini.

Sabry memberitahu, sehingga kini kompleks tersebut digunakan oleh kira-kira 500 bot nelayan setahun. Menurutnya, Kompleks LKIM yang dibina sejak 1996 itu berkemampuan untuk mendaratkan 20,000 metrik tan ikan atau hasil laut setahun. Katanya, namun, sehingga kini ia menjadi tempat untuk mendaratkan kira-kira 25,000 metrik tan ikan setiap 12 bulan. "Berdasarkan kadar pendaratan itu, ia menjadikan Kompleks LKIM Kuala Perlis tempat pendaratan ikan kedua terbesar di Malaysia selepas di Kuantan, Pahang," jelasnya.

## **20 Mac 2009 (Jumaat)**

### **Lega tempat pendaratan ikan dibaiki**

KANGAR 20 Mac - Langkah kerajaan memperuntukkan RM1.5 juta untuk membaik pulih kompleks Lembaga Kemajuan Ikan Malaysia (LKIM) Kuala Perlis di sini, benar-benar melegakan pengguna terutama nelayan. Pengurus Besar Persatuan Nelayan Negeri Perlis, Yusri Mat Isa (**gambar**) berkata, keputusan itu melegakan kira-kira 5,000 nelayan dan amat dihargai oleh para pengguna lain. "Selain nelayan, kompleks yang sama turut digunakan oleh para pemborong, pengimport, pengeksport, peraih dan usahawan memproses hasil laut. "Kami berterima kasih kepada kerajaan kerana sentiasa peka terhadap tuntutan semasa masyarakat nelayan," ujarnya kepada *Utusan Malaysia* di sini baru-baru ini.

Yusri berkata, pihaknya juga berharap kompleks berkenaan bukan sahaja dibaik pulih tetapi dinaikkan taraf secepat mungkin. "Kapasiti pendaratan ikan bagi kompleks ini ialah 20,000 metrik tan setahun. "Namun begitu, sekarang ia digunakan untuk mendaratkan kira-kira 25,000 metrik tan hasil laut setahun. "Kami benar-benar berharap agar kerajaan dapat menaikkan taraf kompleks ini supaya ia boleh mendaratkan ikan 50,000 metrik tan setahun," jelasnya.

## **21 Mac 2009 (Sabtu)**

### **RM1.8j tingkat prasarana Tabika Kemas**

JERANTUT 21 Mac - Sebanyak RM1.8 juta diperuntukkan bagi menyediakan prasarana pembelajaran dan pengajaran yang lebih kondusif di 863 buah taman bimbingan kanak-kanak (Tabika) di seluruh negeri. Pengarah Jabatan Kemajuan Masyarakat (Kemas) Pahang, Nik Man Nik Ya berkata, ia membabitkan kos memasang lantai marmar, pembinaan landskap dan menaik taraf keseluruhan bangunan Tabika bagi keselesaan 16,600 kanak-kanak berkenaan. Katanya, ia juga melibatkan kos menambah perabot seperti kerusi, meja dan alat bantuan mengajar untuk 50 buah Tabika di luar bandar.

Beliau berkata, pembangunan prasarana itu dibuat secara berperingkat membabitkan 14 buah kawasan Parlimen. "Pelaksanaan projek itu sejajar dengan hasrat kerajaan untuk mewujudkan suasana pembelajaran dan pengajaran yang lebih kondusif dan ceria," katanya selepas melakukan lawatan kerja ke Tabika Kemas Kampung Kuala Sat Hulu Tembeling di sini, semalam.

Dalam hal ini katanya, Kemas akan turut menyediakan kemudahan pembelajaran teknologi komunikasi dan maklumat (ICT) bagi meningkatkan mutu pembelajaran dan pengajaran di Tabika. "Kita telah menyediakan 200 unit komputer tambahan tahun ini, berbanding 150 unit tahun lalu untuk membolehkan pembelajaran dan pengajaran dilaksanakan dengan lebih sistematik," katanya.

## **21 Mac 2009 (Sabtu)**

### **Jambatan kedua siap ikut jadual - kontraktor**

PULAU PINANG 21 Mac — Pembinaan di bahagian laut Jambatan Kedua Pulau Pinang sepanjang 6.37 kilometer dijangka siap mengikut jadual, kata kontraktornya China Harbour Engineering Company (CHEC) Ltd hari ini. Presiden CHEC, Sun Ziyu berkata sebanyak 10 peratus kerja pembinaan yang menghubungkan Batu Maung di sebelah pulau dan Batu Kawan di tanah besar, telah siap. Jambatan kedua itu sepanjang 24 kilometer. "Selepas mengumpul semua data ujian, kami kini sedang melakukan kerja menanam cerucuk. Kerja menanam cerucuk berjalan dengan lancar," katanya kepada pemberita semasa lawatan ke tapak projek di Batu Maung hari ini.

CHEC yang diberi surat tawaran projek pada 20 Okt tahun lepas, untuk melaksanakan pakej pertama daripada tiga pakej projek jambatan itu, memulakan kerja pada November tahun lepas dan dijangka menyiapkan pakej tersebut menjelang Mei 2012. Pakej pertama itu bernilai RM2.2 bilion. Pembinaan jambatan kedua itu dilaksanakan secara usahasama antara CHEC dan UEM Builders Bhd.

## **22 Mac 2009 (Ahad)**

### **RM17.5j untuk perbanyak tukun tiruan**

LANGKAWI 22 Mac — Kementerian Pertanian dan Industri Asas Tani memperuntuk RM17.5 juta tahun ini bagi membina lebih banyak tukun tiruan untuk meningkatkan pembiakan ikan di perairan negara.

Menterinya Datuk Mustapa Mohamed berkata, ia merupakan tambahan RM10 juta berbanding peruntukan RM7.5 juta setahun bagi tahun ini. Sebanyak RM7.5 juta diperuntukkan bagi tujuan yang sama tahun depan. Ini berikutan kajian mendapati tukun tiruan mampu menambah pendapatan nelayan sekurang-kurangnya 30 peratus apabila sumber ikan negara meningkat melalui dengan adanya tukun tiruan, katanya.

“Kementerian turut memperuntuk RM1 juta untuk membina lebih banyak tukun tiruan di Langkawi yang mempunyai hampir 4,000 nelayan,” katanya kepada pemberita selepas program masyarakat nelayan bersama Menteri dan hari bersama pelanggan Jabatan Perikanan di pekarangan Pejabat Perikanan Langkawi, di Bukit Malut di sini hari ini.

Pada majlis tersebut, Mustapa turut menyampaikan 442 lesen kepada nelayan di Langkawi. Beliau berkata, kementerian sedang memberi tumpuan kepada sektor perikanan kerana bekalan ikan negara tidak meningkat secara mendadak, sebaliknya permintaannya semakin tinggi menyebabkan harga melambung. “Untuk tujuan itu kementerian mengadakan beberapa insentif kepada nelayan selain menambah kemudahan dan membanyakkan ladang ikan dengan tukun tiruan di lautan,” katanya.

Selain itu, kementerian turut menerima peruntukan sebanyak RM50 juta pada tahun ini untuk kerja-kerja pembinaan jeti-jeti nelayan di seluruh negara, katanya.

## **22 Mac 2009 (Ahad)**

### **Kerajaan beri projek lebih RM3b**

PUTRAJAYA 22 Mac — Hanya dua minggu selepas membentangkan pakej rangsangan ekonomi kedua di Parlimen, Timbalan Perdana Menteri Datuk Seri Najib Tun Razak hari ini mengumumkan bahawa kerajaan telah memberikan projek-projek bernilai RM3.202 bilion minggu ini. Najib yang juga Menteri Kewangan berkata jumlah itu RM1.3 bilion diberi kepada kontraktor bagi menambahbaik, meningkat dan memajukan kemudahan dan infrastruktur di 322 sekolah di seluruh negara. Kira-kira RM95.5 juta pula akan diberi bagi projek menambahbaik dan memulihkan balai-balai polis.

“Pemberian projek-projek yang begitu cepat dibuat selepas bajet mini dibentangkan di Parlimen menunjukkan betapa seriusnya pihak berkuasa bagi menangani krisis global yang juga memberi kesan kepada Malaysia,” kata Najib dalam satu kenyataan di sini. Najib berkata ini juga menunjukkan bukti betapa seriusnya perhatian kerajaan demi kepentingan rakyat dan bagi merangsang keyakinan dan aktiviti sektor swasta.

## **23 Mac 2009 ( Isnin )**

### **Institusi jaminan kewangan ditubuh 2 bulan lagi**



NAJIB Tun Abdul Razak melihat nota yang diberikan oleh seorang peserta Simposium Usahawan Bumiputera Malaysian Industrial Developement Finance Bhd., sambil diperhatikan Muhyiddin Yassin di Kuala Lumpur, semalam.

KUALA LUMPUR 23 Mac – Datuk Seri Najib Tun Razak hari ini berkata, institusi jaminan kewangan yang menjana pinjaman daripada pasaran bon, akan ditubuhkan oleh Bank Negara Malaysia (BNM) dalam tempoh dua bulan lagi dengan modal awal RM1 bilion. Timbalan Perdana Menteri berkata, institusi itu menerbitkan bon berjumlah RM15 bilion dan menawarkan pembiayaan kepada syarikat-syarikat kecil yang berdaya maju untuk mengharungi kegawatan ekonomi semasa. Katanya, pembiayaan itu akan ditawarkan kepada syarikat berpotensi yang hanya mempunyai taraf AA atau A sahaja. “Kita memerlukan ini kerana sesetengah syarikat yang baik tidak mempunyai penarafan AAA. Masa ini, hanya syarikat bertaraf AAA mendapat akses kepada pasaran bon. Ini merupakan inisiatif jangka panjang,” jelas beliau.

Najib berkata, prestasi institusi itu akan dipantau oleh BNM untuk memastikan syarikat-syarikat kecil yang tidak diberikan penarafan oleh agensi-agensi penarafan, mendapat pembiayaan. Beliau berkata demikian selepas merasmikan Simposium Usahawan Bumiputera Malaysian Industrial Development Finance Bhd. (MIDF) di sini hari ini. Hadir pada majlis itu ialah Menteri Perdagangan Antarabangsa dan Industri, Tan Sri Muhyiddin Yassin dan Pengurus MIDF, Tan Sri Mahmood Taib.

Penubuhan institusi jaminan kewangan terkandung dalam teras ketiga pakej rangsangan ekonomi kedua yang dibentangkan di Parlimen, baru-baru ini. Sementara itu, Najib berkata, jumlah mudah tunai dalam negara adalah besar sebanyak RM250 bilion yang boleh digunakan oleh institusi perbankan untuk menawarkan pinjaman terutamanya perusahaan kecil dan

sederhana (PKS). "Setakat ini, kita tidak mengalami kekurangan kecairan wang dalam negara malah kerajaan boleh menggunakan untuk faedah masyarakat dan syarikat-syarikat yang bermasalah," katanya.

PKS menyumbang sebanyak 32 peratus kepada Keluaran Dalam Negara Kasar. Sehingga kini PKS, menyumbang sebanyak 56 peratus kepada jumlah pekerjaan negara manakala 99 peratus lagi disumbangkan dalam jumlah perniagaan berdaftar. Najib yang juga Menteri Kewangan berkata, kerajaan akan turut menyediakan insentif menggalakkan institusi kewangan memberi pinjaman dengan memberi jaminan bayar balik kepada institusi berkenaan bagi mengurangkan risiko tanggungan. "Salah satu daripada punca penting dalam menghadapi kemelut dunia ialah memastikan sistem kewangan negara dapat menyalurkan pinjaman kepada para pengusaha yang memerlukannya," kata beliau. "Selagi sektor perbankan tidak memberi pinjaman, selama itu usaha untuk memulihkan ekonomi dunia tidak akan berjaya," katanya.

Terdahulu ketika berucap pada simposium itu, Najib menegaskan, golongan bumiputera yang tidak mempunyai sikap positif tidak harus menjadi usahawan kerana ia hanya membazirkan masa dan wang kerajaan. Timbalan Perdana Menteri memberitahu, hanya golongan bumiputera yang bersedia dari segi komitmen dan mental bagi menghadapi sebarang cabaran serta dugaan dalam perniagaan sahaja yang harus menceburi dalam bidang ini. "Ini merupakan aspek yang amat penting dan kalau tidak ada sikap positif, jangan jadi usahawan kerana anda hanya membazirkan masa dan wang kerajaan," katanya.

## 23 Mac 2009 (Isnin)

### e-tender dilancar untuk kemudahan kontraktor

KUALA LUMPUR 23 Mac - Kementerian Kerja Raya melancarkan sistem pengurusan tender secara elektronik atau e-tender bertujuan memudahkan kontraktor membeli borang tender tanpa perlu beratur panjang. Menterinya, Datuk Seri Ir. Mohd. Zin Mohamed (**gambar**) berkata, melalui e-tender, keseluruhan proses pemerolehan tender daripada pengiklanan hingga penilaian dilakukan secara automatik menggunakan dua kaedah iaitu secara dalam talian atau CD ROM. Beliau berkata, pelaksanaan pengurusan tender secara elektronik mampu mempertingkatkan kualiti sistem penyampaian maklumat serta memastikan proses pemerolehan tender dijalankan dengan lebih telus dan berintegriti.

"Kini terpulang kepada kontraktor untuk memilih menggunakan online yang disediakan oleh Lembaga Pembangunan Industri Pembinaan Malaysia (CIDB) di <http://www.etender.com.my> atau pun CD ROM. "Dengan kaedah ini, para kontraktor tidak perlu lagi mendapatkan maklumat mengenai tender dan menghantar permohonan tender kepada Jabatan Kerja Raya (JKR) seperti sebelum ini, hanya perlu melayari laman web yang disediakan," katanya.

Beliau berkata demikian kepada pemberita selepas majlis penyerahan sijil penglibatan kontraktor kelas F Wilayah Persekutuan dan pelancaran sistem pengurusan e-tender di sini hari ini. Mohd. Zin menjelaskan, setakat ini tiga projek telah ditender menggunakan sistem tersebut secara dalam talian, manakala CD ROM pula lebih 500 projek. Katanya, sistem e-tender itu dilaksanakan sejak 2001 iaitu menerusi fasa pertama dan kedua, namun reaksi yang diterima daripada pihak kontraktor tidak memuaskan. Sehubungan itu, jelas beliau, kementerian sekali lagi memperbaharui sistem berkenaan dengan mewujudkan fasa ketiga dan keempat dalam usaha menghapuskan sistem permohonan melalui borang.

Menurut beliau, pada fasa ketiga ini, para kontraktor boleh terus melihat senarai kuantiti serta dibenarkan untuk terus memasukkan harga secara luar talian di JKR. Bagi fasa keempat, katanya, ia membabitkan proses pembukaan dan penilaian tender, kedua-dua fasa ini berbeza dengan fasa pertama dan kedua iaitu hanya membuka proses pengiklanan dan penjualan serta pembelian.

"Diharap dengan pembaharuan sistem e-tender ini, ia akan lebih telus sekali gus membangunkan sistem pembinaan pemerolehan simpanan kebangsaan (CPR)." Selain itu, ia juga dapat mengurangkan kos penggunaan kertas dalam penyediaan dokumen tender untuk kontraktor dan mengurangkan harga dokumen tender yang dijual," katanya.

Sementara itu, Mohd. Zin memberitahu, sehingga Februari lalu, sebanyak 4,373 kontraktor kelas F daripada 17,000 yang aktif telah mendapat tawaran projek daripada kontraktor utama yang melibatkan nilai RM860 juta. Beliau menjelaskan, semua kontraktor yang ditawarkan itu telah melalui proses pelaksanaan kementerian di bawah pekeliling dan arahan pentadbiran, iaitu setiap kontrak yang berharga RM10 juta, 10 peratus daripadanya perlu diagihkan kepada kontraktor kelas F.

## 23 Mac 2009 (Isnin)

### Bimbang jambatan runtuuh

Oleh CIK ROSMA CHE ABU BAKAR pengarang@utusan.com.my



KETIADAAN palang had ketinggian kenderaan pada jambatan di kawasan komersial Pandan Indah membolehkan jambatan itu dilalui oleh semua kenderaan walaupun ia sebenarnya dibina untuk kenderaan ringan sahaja.

AMPANG 23 Mac - Jangan sudah terhantuk baru terngadah. Pepatah Melayu itu membawa pengertian hanya sesudah mengalami kecelakaan barulah hendak beringat-ingat. Situasi itu sering berlaku dalam kehidupan sehari-hari masyarakat termasuk dalam soal penyalahgunaan kemudahan awam yang disediakan. Bagi penduduk kawasan komersial Pandan Indah, isu jambatan yang menghubungkan penduduk setempat dengan kawasan-kawasan industri dan kedai di situ boleh dikaitkan dengan situasi itu. Jambatan yang dibina sebagai laluan kepada kenderaan ringan, kini digunakan oleh kenderaan berat seperti lori yang muatannya melebihi tiga tan dan juga bas termasuk bas sekolah.

Had ketinggian kenderaan yang berupa penghadang besi yang dibina telah tiada di tempatnya, dipercayai dicabut oleh pihak tertentu supaya semua kenderaan boleh melalui jambatan itu. Paling membimbangkan penduduk, terdapat tiang konkrit pada jambatan itu yang sudah pecah mengakibatkan besi yang menjadi kerangkanya terjulur keluar. Tidak mustahil kerangka besi itu boleh mengundang maut jika ada pengguna yang melalui jambatan itu tergelincir dan tercucuk pada besi yang karat itu. Namun, apa yang paling merisaukan penduduk ialah sama ada jambatan itu benar-benar kukuh untuk menampung berat kenderaan-kenderaan yang melaluinya saban hari?

Menurut penduduk, sebelum ini pihak Majlis Perbandaran Ampang Jaya (MPAJ) pernah menghantar jurutera mereka untuk memeriksa jambatan tersebut. Lapang sebentar dada penduduk apabila dikhabarkan jambatan tersebut masih berada dalam keadaan stabil dan kukuh. Persoalannya ialah berapa lama ia mampu bertahan? Adakah struktur pembinaan jambatan ini masih utuh seperti asalnya jika saban hari dilalui oleh kenderaan berat yang melebihi had dibenarkan?

Perkara inilah yang membimbangkan mereka. Jika dilihat dengan mata kasar, mungkin seperti tiada apa yang perlu dirisaukan kerana jambatan ini dibina dengan tembok yang kelihatan kukuh. Namun, jika diperhatikan di bawah jambatan itu, terdapat serpihan batu-bata hampir separuh saiz sebuah kereta kancil terdampar di situ. Adakah batu-bata itu dari jambatan tersebut? Mengapa ia pecah? Tidak salah untuk penduduk menjangkakan sesuatu yang buruk terhadap kekuahan jambatan itu kerana sejak tiga tahun lalu, pelbagai jenis kenderaan berat sudah melaluinya. Sebelum ini, had ketinggian pada jambatan itu pernah dibaiki oleh MPAJ apabila ada pihak merobohkannya tetapi kejadian itu berulang lagi.

Pengerusi Persatuan Penduduk Kawasan Komersial Pandan Indah, **How Yoke Wah** berkata, sikap sesetengah pemandu kenderaan berat yang hanya memikirkan kemudahan mereka perlu dibendung sebelum sesuatu yang buruk berlaku. "Kami harap pihak berkuasa membina semula had ketinggian dan papan kenyataan had berat di jambatan ini yang sudah hilang bagi mengelak kenderaan berat melaluinya. "Pemandu-pemandu kenderaan berat tahu bahawa mereka tidak boleh melalui jambatan tersebut tetapi oleh kerana tiada halangan, mereka lalu sahaja. "Akibat berat yang keterlaluan, ada bahagian jambatan itu yang sudah pecah," katanya sambil menunjukkan tembok yang pecah dan serpihannya.

Sementara itu, salah seorang penduduk di situ, **Loh Chee Keong** turut merasa khuatir dengan kestabilan jambatan tersebut. "Saya agak risau akan kekukuhannya struktur jambatan ini. Saya bimbang bahagian bawah jambatan ini tidak dibina dengan kukuh kerana ia asalnya adalah untuk kenderaan ringan sahaja. "Perkara ini perlu dikaji oleh pihak berkuasa," katanya yang tidak mahu apabila sudah berlaku sesuatu yang tidak diingini barulah tindakan diambil.

Sementara itu, Ahli Majlis MPAJ, **Keppy Wong** berkata, beliau akan meminta MPAJ membina semula had ketinggian itu bagi mengelakkan perkara yang tidak diingini berlaku. "Saya akan bawa perkara ini ke MPAJ dan akan cuba mencari jalan penyelesaian yang terbaik demi untuk kepentingan masyarakat," katanya.

Beliau mengakui menerima banyak aduan daripada penduduk yang bimbangkan keselamatan jambatan itu kerana ia dibina untuk laluan kenderaan ringan sahaja.

## **23 Mac 2009 ( Isnin )**

### **RM280j pulihara pesawat pejuang**

Laporan HERMAN HAMID, NIZAM YATIM dan YANG CHIN MEE

KUALA LUMPUR 23 Mac - Kementerian Pertahanan memperuntukkan RM280 juta untuk kos operasi dan memulihara semua pesawat pejuang miliknya pada tahun lalu. Perdana Menteri, Datuk Seri Abdullah Ahmad Badawi berkata, jumlah berkenaan adalah lebih banyak berbanding RM225 juta yang diperuntukkan pada 2007. "Langkah ini adalah bagi menjamin keselamatan dan kedaulatan negara serta memastikan pesawat pejuang berkenaan sentiasa berada pada tahap siap siaga," katanya dalam jawapan bertulis kepada soalan **Lim Lip Eng (DAP-Segambut)** pada sidang Dewan Rakyat hari ini.

Lip Eng ingin tahu butiran kos bagi memulihara pesawat terbabit bagi tahun 2007 dan 2008 serta jumlah pesawat berbanding bilangan juruterbang yang layak mengendalikannya. Dalam pada itu, Abdullah yang juga Menteri Pertahanan berkata, terdapat 74 juruterbang yang telah dilatih bagi mengendali 19 pesawat Hawk manakala 40 juruterbang untuk memandu 16 pesawat MiG-29. "Sebanyak 32 juruterbang juga disediakan bagi mengendali lapan pesawat F/A 18D dan tujuh juruterbang untuk 12 pesawat Sukhoi SU-30 MKM," jelasnya.

Beliau berkata, Angkatan Tentera Malaysia (ATM) setakat ini tidak mempunyai masalah dengan bilangan juruterbang yang berkelayakan bagi memandu pesawat terbabit kecuali bagi pesawat Sukhoi. "Ini kerana sebilangan juruterbang pesawat Sukhoi berkenaan masih dalam proses latihan. "Kita memerlukan masa untuk melatih juruterbang dengan kemahiran yang diperlukan bagi memastikan mereka sentiasa bersiap sedia untuk menghadapi sebarang ancaman dan keadaan," katanya.

Sementara itu, dalam jawapan bertulis kepada soalan **Liew Chin Tong (DAP-Bukit Bendera)**, Abdullah berkata, adalah tidak wajar untuk membuat perbandingan antara nisbah Bajet Mengurus dan Bajet Pembangunan Kementerian Pertahanan mengikut tahun. "Ini kerana Bajet Mengurus disediakan untuk menampung keperluan perbelanjaan operasi harian tahunan manakala Bajet Pembangunan adalah peruntukan bagi perbelanjaan sepanjang Rancangan Malaysia untuk tempoh lima tahun," katanya.

Katanya, peruntukan Bajet Mengurus untuk kementerian itu pada 2009 ialah sebanyak RM10.65 bilion dan Bajet Pembangunan pada tahun berkenaan ialah RM2.35 bilion. "Walaupun jumlah Bajet Pembangunan adalah rendah pada tahun 2009 tetapi sekiranya dikira untuk tempoh lima tahun sepanjang Rancangan Malaysia Kesembilan (RMK-9) ia berjumlah RM13.95 bilion," jelasnya.

Dalam perkembangan lain, katanya, kerajaan tidak bercadang menjemput ahli-ahli Parlimen untuk melihat sebarang latihan ketenteraan yang dikendalikan oleh ATM. "Kementerian juga tidak bercadang untuk menganjurkan sebarang seminar bagi meningkatkan kefahaman ahli Parlimen mengenai hala tuju pertahanan negara," katanya.

## 24 Mac 2009 (Selasa)

### 34 premis diarah tutup sementara

Oleh HUSSAINI AMRAN [utusanN9@utusan.com.my](mailto:utusanN9@utusan.com.my)



OMAR Mihat (kanan) bersama anggota penguat kuasa menampal notis penutupan premis di sebuah restoran dalam operasi mengejut di sekitar bandar Seremban, semalam.

SEREMBAN 24 Mac - Jabatan Kesihatan negeri mengeluarkan arahan penutupan sementara kepada 34 daripada 50 premis menjual makanan yang diperiksa di sekitar bandar ini dalam satu operasi mengejut malam tadi. Timbalan Pengarah Kesihatan Negeri (Kesihatan Awam), Dr. Omar Mihat berkata, arahan penutupan selama 14 hari dikeluarkan ke atas premis-premis tersebut setelah didapati tidak memenuhi syarat kawalan mutu kebersihan seperti ditetapkan di bawah Seksyen 11, Akta Makanan 1983.

Beliau yang mengetuai operasi berkenaan berkata, pengusaha terbabit perlu meningkatkan tahap kebersihan premis menjual makanan mereka mengikut arahan pihaknya dalam tempoh

yang diberikan. "Operasi dijalankan secara mengejut bagi memastikan premis dalam keadaan bersih serta makanan yang dijual selamat untuk dimakan," ujarnya ketika ditemui pada sidang akhbar operasi pemeriksaan mengejut premis menjual makanan di sini malam tadi.

Operasi itu yang melibatkan seramai 56 anggota penguat kuasa Jabatan Kesihatan Seremban, Jelebu, Kuala Pilah, Rembau, Port Dickson dan Jempol turut disertai enam pegawai Majlis Perbandaran Seremban (MPS). Selain 34 arahan penutupan sementara oleh Jabatan Kesihatan negeri, sebanyak 14 kompaun berjumlah RM3,500 dikeluarkan oleh MPS.

Dr. Omar berkata, kesalahan yang dikesan termasuk tahap kebersihan premis, perkakasan dan makanan yang rendah. "Kami mengesan ada pengendali makanan meletakkan daging mentah di atas lantai dengan hanya beralaskan surat khabar lama. "Di samping itu, kesalahan lain yang sering dilakukan adalah penggunaan landas cincang yang diperbuat daripada kayu," kata beliau.

Menurutnya lagi, terdapat pengendali makanan yang gagal memakai apron atau penutup kepala serta tidak mendapatkan suntikan pencegahan tifoid. Dr. Omar memberitahu, pengusaha terbabit turut diberi penerangan tentang kepentingan menjaga kebersihan premis masing-masing bagi mencegah penyakit bawaan makanan. Tegas beliau, Jabatan Kesihatan negeri akan terus menjalankan aktiviti penguatkuasaan dari semasa ke semasa untuk memastikan peruntukan-peruntukan di bawah Akta Makanan 1983 dan Peraturan-Peraturan 1985 dipatuhi di premis-premis menjual makanan.

## 24 Mac 2009 (Selasa)

### Hampir 20 tahun hidu asap

Oleh SAFINA RAMLI [utusankedah@utusan.com.my](mailto:utusankedah@utusan.com.my)



KILANG kopi yang didakwa mengganggu penduduk di Kampung Diraja Anak Bukit, Alor Setar.

ALOR SETAR 24 Mac - "Kami sudah tidak tahan menghidu asap setiap hari selama hampir 20 tahun sejak kilang kopi ini memulakan operasi." Itulah luahan penduduk Kampung Diraja Anak Bukit di sini yang terpaksa menghidu asap dari sebuah kilang memproses kopi yang terletak berhampiran kampung mereka.

Seorang wakil penduduk yang hanya mahu dikenali sebagai Ahmad, 40-an berkata, kilang kopi itu telah memulakan operasi sejak tahun 1980-an di kampung tersebut. Katanya, sebanyak 15 keluarga yang tinggal dekat kilang kopi terbabit mendakwa kesihatan mereka sering terganggu kerana menghidu asap dari kilang itu setiap hari. "Rumah kami dipenuhi dengan debu hitam setiap kali kilang tersebut memproses kopi. "Dalam seminggu, sejak puluhan tahun lalu, lima hari mereka akan membakar biji kopi, bermula pukul 10 pagi sehingga lewat petang barulah mereka berhenti," ujarnya ketika ditemui *Utusan Malaysia* di sini hari ini.

Menurutnya, aduan mengenai kilang kopi itu telah diajukan kepada pelbagai pihak seperti Ahli Dewan Undangan Negeri (ADUN), Biro Pengaduan Awam dan sebagainya sejak tahun 1998, namun masih tiada penyelesaian. "Kami ditendang seperti bola apabila mengadu mengenai masalah ini kerana apabila saya pergi ke Majlis Bandaraya Alor Setar (MBAS), mereka suruh saya pergi ke Jabatan Alam Sekitar. "Apabila ke sana (Jabatan Alam Sekitar), jawapan yang diterima amat mendukacitakan kerana pelbagai pihak saling tuding-menuding antara satu sama lain," katanya.

Jelasnya, penduduk hanya mahu kilang tersebut memindahkan operasinya ke tempat yang jauh dari penempatan penduduk. "Pada tahun 1998, pengurus kilang berkenaan memberitahu mereka akan berpindah ke Jitra namun janji itu hanya tinggal janji kerana sehingga kini, operasi di kawasan tersebut masih berjalan seperti biasa. "Kanak-kanak di sekitar kawasan ini sering mengalami batuk dan dipercayai kesihatan mereka terganggu akibat sering menghidu asap daripada kilang berkenaan," ujarnya.

## **24 Mac 2009 (Selasa)**

### **FAMA bantu 100 usahawan tani Ladang Kontrak**

temerloh 24 Mac - Lembaga Pemasaran Pertanian Persekutuan (fama) Daerah Temerloh akan membantu 100 usahawan tani di peringkat Parlimen Kuala Krau menerusi program Ladang Kontrak membabitkan kawasan seluas 320 hentar. Pegawai fama daerah Temerloh, Abdul Razak Abdul Karim berkata, menerusi program itu fama yang berperanan sebagai fasilitator akan membantu usahawan tersebut dari segi pemasaran, memberikan khidmat nasihat dan menentukan jenis tanaman yang berdaya maju. Katanya, fama juga akan membekalkan benih berkualiti bagi memastikan hasil tanaman dikeluarkan bermutu tinggi dan mendapat pasaran yang baik.

"Program Kementerian Pertanian dan Industri Asas Tani ini adalah berimpak tinggi untuk meningkatkan pendapatan petani dan usahawan melalui pemasaran bersistematis bagi membantu mereka memperoleh pendapatan sekurang-kurang RM2,000 sebulan," katanya kepada *Utusan Malaysia* di sini, hari ini. Program itu dilancarkan oleh Ahli Dewan Undangan Negeri (ADUN) Jenderak, Datuk Mohamed Jaafar di Kuala Krau dekat sini.

Abdul Razak menambah, program itu yang mendapat kerjasama Bank Agro dan Lembaga Pertubuhan Peladang akan dimulakan dengan tanaman sayur-sayuran dan buah-buahan membabitkan 30 petani di mana setiap peserta akan mengusahakan tanah seluas 3.2 hektar. Katanya, bagi buah-buahan ia melibatkan tanaman tembikai, mangga, nangka madu, cempedak, pisang, manggis, durian dan duku, manakala sayur-sayuran pula membabitkan kacang panjang.

Menurut Abdul Razak, menerusi program Ladang Kontrak, fama dapat membantu usahawan tani mengeluarkan hasil tanaman yang memenuhi jaminan daripada aspek keselamatan makanan. Katanya, semua hasil ladang akan dikumpulkan di pusat pengumpulan dan pemasaran sebelum digred dan dibungkus sebagai memenuhi kehendak pengguna serta pengilang. "Para petani di Kuala Krau yang tidak menyertai program Ladang Kontrak bersama fama juga boleh memohon untuk menjadi peserta," katanya.

Sementara itu, Mohamed dalam ucapannya menyeru agensi kerajaan berkenaan membantu dan memberikan khidmat nasihat secara langsung kepada petani dan usahawan supaya mereka mampu menghasilkan produk berkualiti dan memenuhi kehendak pasaran. "Saya berharap agensi terbabit bukan sahaja menyalurkan bantuan seperti baja, benih dan sebagainya tetapi turut memantau perkembangan dari semasa ke semasa agar para petani mendapat bimbingan yang betul. "Kerajaan sebenarnya telah melancarkan pelbagai program pertanian bagi membantu petani menghasilkan produk yang berkualiti tetapi kerana kurangnya pemantauan daripada agensi terbabit, usaha itu tidak mencapai matlamat," kata beliau.

Menurut Mohamed, sektor pertanian kini tidak lagi dikaitkan dengan kemiskinan kerana di negara maju khususnya, petani mampu hidup senang dan ramai yang menjadi jutawan.

## **24 Mac 2009 (Selasa)**

### **Pengundian kerja kontraktor kecoh**



KAMALUDDIN Hassan menunjukkan laporan polis yang dibuatnya kerana disekat untuk kelayakan mengundi kontrak kerja kelas F di Kota Tinggi, semalam.

KOTA TINGGI 24 Mac - Sesi pendaftaran untuk pengundian kerja kontraktor Kelas F di Dewan Jubli Intan Sultan Ibrahim di sini, kecoh apabila seorang kontraktor naik angin kerana disekat untuk kelayakan mengundi, semalam. Suasana mula tegang sejurus selepas kontraktor terbabit,

Kamaluddin Hassan 49, dikatakan diberitahu oleh petugas di situ bahawa syarikatnya tidak layak mengundi untuk mendapatkan kontrak kerja pejabat daerah. Katanya, ini kerana wujudnya dakwaan bahawa syarikatnya iaitu Syarikat Kamaluddin Bin Hassan telah mendapat satu kerja secara pengundian pada awal tahun ini.

"Setelah beratur agak lama dan apabila tiba giliran untuk mendaftar, petugas memaklumkan bahawa syarikat saya tidak layak mengundi dengan alasan telah mendapat satu kerja secara pengundian pada awal 2009. "Saya hairan bagaimana ia boleh berlaku sedangkan syarikat saya tidak pernah mendapat sebarang kerja daripada Jabatan Pembangunan Negeri sejak tiga tahun lalu," katanya.

Sesi pendaftaran untuk mengundi kerja kontraktor kelas F diadakan oleh Jabatan Pembangunan Negeri bersama Pejabat Daerah Kota Tinggi serta beberapa agensi kerajaan lain. Kamaluddin yang kecewa dengan perkara itu kemudian membuat laporan polis di Ibu Pejabat Polis Daerah Kota Tinggi, di sini. Katanya, dia turut kesal dan mendakwa pihak berkenaan melarang kontraktor yang ada hubungan keluarga seperti anak-beranak dan suami isteri menyertai pengundian kerja.

Beliau yang menjadi kontraktor secara aktif sejak 1990 dan sejak itu tidak pernah 'mengalibabakan' kontrak yang diperoleh. Menurutnya, sejak 2005 beliau telah membeli lebih 100 borang dan memasuki sebut harga di Pejabat Daerah, Majlis Daerah Kota Tinggi (MDKT) termasuk Jabatan Pengairan dan Saliran (JPS). Katanya, dalam tempoh itu, dia hanya berjaya mendapat satu kerja secara undi pada 2006 dan sebut harga kerja MDKT pada 2007 sahaja. Dalam pada itu, beliau mendakwa, pernah dipanggil oleh Ketua Penolong Pegawai Daerah dan juruteknik untuk melawat tapak di Kompleks Penghulu Mukim Ulu Sungai Johor, Jalan Kulai untuk kerja membaiki anjung yang rosak di rumah rasmi penghulu pada 2007.

Beliau mendakwa diarahkan membaiki bahagian rumah itu dengan harga RM10,000 dan inden kerja akan diberi kemudian. "Malangnya inden bagi kerja yang saya telah siapkan dalam tempoh dua minggu itu sehingga sekarang termasuk bayaran RM10,000 langsung tak nampak bayangannya," katanya.

Kamaluddin berharap agar mana-mana kontraktor yang tidak berpuas hati berkaitan pengurniaan sebut harga atau agihan kerja, segera tampil menyatakan perkara itu secara terbuka. "Jangan hanya berani komen di belakang, kita perlu guna saluran telus menganjurkan satu dialog bersama agensi pelaksana dan mengundang sama Suruhanjaya Pencegahan Rasuah Malaysia (SPRM) sebagai pemerhati," katanya.

Sementara itu, Pegawai Daerah Kota Tinggi, Norizan Kulob yang ditemui di dewan tersebut pada sesi yang sama, enggan memberi sebarang kenyataan berhubung perkara itu. Beliau sebaliknya menyerahkan kepada pihak Jabatan Pembangunan Negeri untuk menyelesaikan perkara berkenaan.

**24 Mac 2009 (Selasa)**

## **APMM Kudat mampu kurangkan pencerobohan**



**ANGGOTA APMM dan Ahli Jawatankuasa Bestari Pulau Banggi merakam kenangan selepas majlis APMM bersama Komuniti Bestari Pulau Banggi, Kudat, kelmarin.**

KUDAT 24 Mac - Pembukaan pejabat Agensi Penguatkuasaan Maritim Malaysia (APMM) daerah Kudat tidak lama lagi mampu mengurangkan pencerobohan nelayan asing di bahagian utara perairan Sabah. Ketua Penguat Kuasa APMM Sabah dan Labuan, Kapten Maritim Mohd. Taha Ibrahim berkata, dengan adanya pejabat APMM yang baru itu, operasi pemantauan di perairan di sekitar daerah ini akan menjadi lebih mudah dan berkesan. "Perairan Sabah sangat luas dan kita perlu sebuah lagi pejabat di bahagian utara kerana terdedah dengan pencerobohan nelayan asing," katanya kepada pemberita selepas majlis APMM bersama Komuniti Bestari Pulau Banggi dekat sini semalam.

Beliau berkata, pejabat APMM Kudat itu merupakan yang kelima di negeri ini selepas Kota Kinabalu, Tawau, Sandakan dan Labuan. Mohd. Taha menyifatkan kewujudan pejabat itu adalah tepat pada masanya sekali gus dapat menambah kekuatan APMM Sabah dan Labuan. Katanya, selain empat pejabat sedia ada, APMM di negeri ini dilengkapkan dengan kemudahan 15 buah kapal besar dan 10 bot laju. Sementara itu, beliau mengingatkan nelayan di Sabah supaya mematuhi peraturan Jabatan Perikanan iaitu dengan tidak menangkap ikan di kawasan perairan yang dilarang.

Perbuatan melanggar peraturan itu, katanya, akan mengakibatkan Sabah dan negara ini bakal berhadapan dengan masalah kepupusan sumber ikan untuk jangka masa yang panjang. Pada masa yang sama, beliau turut mengingatkan nelayan atau pemilik bot besar supaya tidak mengambil rakyat asing yang tidak mempunyai dokumen atau permit bekerja dengan mereka. Katanya, perbuatan tersebut jelas menyalahi undang-undang dan tindakan tegas akan dikenakan terhadap mereka oleh pihak bertanggungjawab.